



舊業堂集卷之三

吳陵凌儒真卿甫著

同羈劉弘學醇伯甫選
侄孫凌榮祖彥先甫訂

詩 七言律 二百三十二首

咏八月九日夜月

碧天秋爽淨烟霏千里清
光照鎖闈太液池邊蟾欲
滿廣寒宮裏兔應肥
溶溶水鑑涼初起
點點星球靜
不飛努力兒曹知
戰勝晚潮看載一船歸

過山亭

三日臨淮偶未過辟疆春色欲如何寶珠亭下茶花
少綠萼山前梅子多海氣蒼茫孤島嶼林光掩映萬
松蘿悅心最是虹飛處風靜池塘水不波

西園睡起獨坐呈劉子厚

長日亭亭欲午天閒雲片片小山前沙明鳥篆千廻
轉槐落蟲絲一丈懸滄海自應尋法侶丹丘何用訪
神仙半床袒跣松風臥未夢羲皇更窅然

同奎老諸君過南莊因遊寺中暮雨作

十里迢遙到化城謀生還欲學無生山前繫纜雲初

起樹裏尋僧鳥不驚一笛晚風偏脫俗半蓑春雨最
關情狂雷無賴催歸興頭上轟轟早有聲

午日友人邀飲

早擬江頭看泛舟病來高枕仲宣樓新懽忽在東鄰
召舊約空期上客遊九辯有人酬楚節獨惺何處吊
湘流庭陰覆一堪沈飲欲折榴花作酒籌

冬夜西園酌子厚諸君

懶慢高陽舊酒徒結交狂客日呼盧坐中清論酬今
古世上浮名任有無燭盡香殘人自醉霜飛木落歲

將徂相看又是梅花發莫令疎林月色孤

奉和元日後坡同紹容對雪試筆

瑤花侵座故沾衣不是漫空柳絮飛
欵索草堂新歲句直凌烏府舊霜威
何妨玉帳耽紅暈自愛青山擁翠微
老興蘇端真不淺洞庭春宴幾時歸

謝君實携酒過西園

孤峰高與泰山齊石蹬盤迴十二梯
滄海暮雲人獨眺玉壺春酒客長携
林鶯恰恰歌聲應湖草青青醉眼迷
繾綣百年佳讌日牡丹花放郡城西

西園邀林孝廉諸君賞花

庭下花開歲舉觴風流今日勝尋常
清尊猶帶山人氣紅袖爭爲國士粧
臨鑑波光搖劍珮隔籬松韻奏笙簧
曲江躍馬他年事踏遍春城十里香

苦雨

風雨蕭蕭正暮春積陰傷麥苦愁人
乾坤有恨懷千古歲月無情寄一身
鞭石回天推郡伯叫閭瞻日泣波臣
何時直指來題犢爲布甘霖七井新

初冬邀客東遊

日上樓船曉霧開淮流十里抱城迴月塘水落漁人
浦天目峰高鹿女臺荏苒年華將老去蕭條寒色送
愁來客懷雅在形骸外滿飲鸕鷀到百杯

其二

虛白堂前日未斜客來槐蔭滿庭遮好詩坐上應難
就薄酒橋邊儘可賒莫以閒心悲世事自將衰髮惜
年華抱琴獨恨南歸早日斷飛鴻天一涯

題鶴亭手卷和韻

蒼藤七尺日枝梧大隱何妨入市塗水月已從方外

侶鶯花還作酒中徒長貧司馬猶能賦高臥元龍不
受呼搔草春深應滿地相期寧用訪蓬壺

輓此菴先生詩

剛腸羞作兒女啼登堂懷德重含悽清風一往故山
北明月還懸舊徑西塵榻蕭蕭孤劍在曉鶯寂寂暮
蟬嘶不堪仲蔚盤桓地三尺蓬蒿舊路迷

醉後和蘇後坡韻

百甕先將五斗嘗老狂客過少年狂霜毛面帶臙脂
色星眼神搖琥珀光杖底挑錢桃竹健池邊割錦墨

香齋堂集 卷之三 四
花香看君遺落人間事洗我憂時一段腸

西園與王明陽丁任甫閒坐

花邊蛺蝶柳邊鶯海蛤江魚續舊盟坐對好山看不厭飲逢佳客醉難醒留人明月披雲出驅暑清風傍竹生共向浮生論得失一盃真勝百年名

夏日西園有友枉顧愧不及留

崇臺一曲抱晴川雨後看山色自鮮黃雀風高應扇暑紅榴花滿欲燃天客來問字翻書篋人去探囊覓酒錢曾似風流前輩好水晶盤具便開筵

十三日雪中留幼度諸君夜坐

節候年來不可知梅花開早雪花遲暗香臘月全浮樹積素春風半上枝雨濕不宜燈市日天寒正是酒家時殘更細酌留深坐笑對瑤華喜氣滋

首夏西園雨中感落花

風雨飄零四月花玉臺紅錦裂輕霞啄殘不待窺園鳥踏碎非關入室騶看去人情渾似妬覺來天道未應嗟辟疆春色爭流轉回首依然滿麗華

香齋堂集 卷之三 五
春來正月三日雨中作

春來底事雨連綿我欲乘槎上問天三日江城思見
日十年水國欲逢年青觴不廢佳辰酒寶篆長燒永
夜烟敢恨老夫扶杖滑喜流膏澤到龜田

侍御姜公閱操

霜飛白簡重臺端閱武江城春正闌細雨洗兵鯨海
靖暖風吹角柳營寒豺狼幾路迴驄馬鸛鶴孤山識
鐵冠聞說激揚先社鼠烟花市裏萬人歡

讀王弇州雜刻

一代鉛華滿耳香卷中佳句見清狂才高本欲凌鸚

鵝筆健猶堪咏鳳凰人世從來生睥睨山川隨處有
輝光吳中自古饒詞賦獨步應兼二陸長

立春後一日卽事

非關耽酒學迂辛雀喙寒梅落已頻春色隨看一刻
減世情爭得百年新無私花鳥閒成伴不妬詩書老
結隣衡泌優游身健在逢人且諱舊臺臣

正月三日晚登一覽臺

高閣凌空四望遙振衣獨上近青霄雲飛北闕風初
定日落西山雪未消明滅暮烟縈迥野縱橫寒鳥集

疎條懽當令節人人醉自笑梅花興也饒

正月三日西園大風

不待春來風已顛殘雲亂起小山前赤團日氣雲全
掃青薄林聲樹半眠柳眼喚殘渾欲醉梅粧噓遍更
成妍飄搖總是陽回候莫道封姨解妬年

西園晚步

冲融日脚四天開抱碧紅光一帶迴七尺短筇將我
去滿山明月爲誰來影搖雙樹寒棲鵲香拂重簷冷
嗅梅乘興憑高還遠眺海門東下是蓬萊

拜老母壽

白髮青毡拜舞低安親更作老萊啼香傳春甕邠人
蟻美薦朝厨茅氏雞未報寸心天罔極且呼百歲岳
爭齊團圞佳慶蘭蓀滿霄路還看次第躋

感懷

門揜寒流事總虛翟家冠蓋日全無驚心節序歸長
往刺眼交情付短吁恩斷驪珠淵客泣愛成燕石宋
人愚春風琴酒西湖曲避世稽康且自娛

過登仙橋晚題

仙真輕舉信耶非
父老都傳此地飛
青壁不留回日路
白雲猶似去時衣
蜿蜒楚水龍長臥
悵望緱山鶴未歸
題柱豈關懷駟馬
少因搖筆駐斜暉

壽竹翁八十詩

却杖堂前八十翁
鐵冠霜髮氣還雄
彩衣進酒千年綠
銀燭開筵五夜紅
舊德盡收天路裏
閒心都歷歲華中
翟公門下人俱老
半似當年半不同

鳳凰墩

威鳳曾棲江上州
一堆空見古高丘
碧梧樹老枝還

長玉液池平水自流
繚繞經聲連峻閣
滄茫海色接危樓
昌期五百當今日
早晚重來此地遊

羅浮山在郡治之北
相傳爲僞吳張士誠故壘
浮山滄海自蓬萊
誰爲分移此一坏
岸草有靈波不沒
渚花無恙鳥頻來
空潭月出魚龍臥
舊里風生虎豹哀
一葉年年秋水上
滄浪幾曲棹歌回

南莊擬邀諸公一春未暇書此道懷

別墅江邊春滿林
馳驅市上廢招尋
烟含綠樹空啼鳥
日照青囊獨抱琴
浪擲真成三月夢
佳遊虛負百

年心馬蹄踏碎紅塵隔竹目芳叢一院深

對月懷友

袒跣空庭看月明四山無復片雲生
乾坤萬里中天色湖海千年此夜情
日落不逢騏驥哭人和猶覩鳳凰鳴
南樓正有庾公興誰與登臨對一枰

西園登臺東眺

長松高閣倚青霄彷彿蓬萊弄玉簫
紫氣東昇滄海日白波西落廣陵潮
樓臺照耀金銀湧島嶼參差烟霧饒
老惜人間骨難換漫從雲水自逍遙

過西園有感

嬾慢真非狎世人東風自領故園春
青山樓閣湖邊好綠水池塘雪後新
鳥下獨憐窺几杖雲來未許染衣巾
知音寥落孤琴廢只傍漁舸理釣綸

暮春感懷

幾陣輕雷散積陰著頭雨點不成霖
烟開柳色濃于染風送花香爽欲侵
天地忽收江海濕樓臺旋動古今吟
行看落日澄湖色好慰傷春一段心

誕日召客

日暖風晴簇小筵南山遙對草堂前
杯拈鸚鵡傳仙液香熱麒麟裊
瑞烟倚席籬花寒馥馥捲簾霜月淨
娟娟百年上客清時宴強飲鑪頭一醉眠

冬至後閒述

山廓冬晴寒氣輕初陽動處覺春生
花枝冉冉紅窺塢梅蕊星星玉綴屏
時序等閒青眼轉乾坤容易白頭成
塵緣謝却同心在日日空林聽鳥聲

花燭詩贈顧小侯所建

良緣天合事非常花似佳人玉似郎
月照寢樓春入

夢雲開粧閣曉焚香禰衡只解題鸚鵡
司馬猶能奏鳳凰衛霍勛名誇閎閎早投
雙燕慰高堂

十月朔日西園賦

起看曙色思徬徨庭院紛紛落木黃
蓄酒床頭辨留客移花齋內避沾霜
寒塘不作芙蓉夢殘草還尋薜荔香
短景又將催歲盡鼎中何藥駐年芳

春日同澄之維新飲懷慎內兄宅

看山每到白雲深花落春殘一醉心
老去訂盟尋谷口興來招隱憶山陰
古槐覆院清留戶鳴鶴窺人響

過林愛客總戎全脫俗不妨但跣縱狂吟

王文泉學博有贈席上倚韻奉酬

霜毡浙浙散春溫鳴鐸聲高動遠村大雅文章全入
彀東風桃李半盈門獨憐冷澹山中味共沐昇平天
上恩一醉習池饒笑語澄波明月雨無痕

西園代柬奎老用李于鱗韻

幾日炎蒸不見君清風芳沼惜離羣吟邊杖履空蒼
蘚望處樓臺漫白雲浮世人情疑寡合小湖秋色欲
平分銷憂多暇期王粲短劄重煩使者聞

荒園邀竹翁小坐

垂柳池邊白鳥過清風亭下送雲和奕殘倚仗閒聽
鶴酒半凭闌笑卷荷塵事漸於浮世遠賞心偏向故
人多月明歸路芙蓉滿何處滄浪發棹歌

仲秋作柬幼安

浮生無計挽回波蕭瑟池塘八月過白鴈海天飛到
少清砧江郭聽來多露華空自滋蒲柳風色偏能老
芰荷荏苒秋光看又半一尊山閣慰蹉跎

沈園晚坐

虛亭聳並太山椒司馬當年興亦饒面闢層巒孤削
壁手栽嘉樹上千霄鳳毛日絢庭前色蘭氣時迴海
上鑣霄霽月明風竹響依稀猶似玉人簫

早春西園爲奎老拂塵

無奈鄉心戀舊何琴書歸向小山阿浮榮自信簪纓
薄春色應知杖履多白髮青天呼月飲滄江短棹扣
舷歌風塵洗後過從數日日初衣掛薜蘿

候幼度圍碁抵暮不至

酒冷香銷白晝閒碁枰寂寂對愁顏美人何處尋芳
草春色無端負好山新水一泓遲日落孤雲幾片暮
禽還空園叢桂堪招隱攜手東風莫厭攀

和詠瘦馬

騰驤曾說五花驄此日顴奇骨擁峰風警有懷垂涕
淚月明無力顧形蹤錦障水滿從誰渡苜蓿花開空
自濃老去壯心渾不死草長猶待好春逢

看新筍

亭畔山南竹幾竿森森叢發小龍蟠籜含勁節梢方
破籬護虛心插自安鳳下層霄新旭曉鶴眠深塢早

霜寒將君十尺爲扶老歲歲樓臺月裏看

晨起微雨

江上纔看一日晴陰雲又覆海陵城青春都自枕中
過白髮紛從鏡裏生杖履尋幽空訂約鶯花沾濕重
含情何人爲向東皇道粧束遊車上已行

秋莊睡後偶述

新涼高枕白雲團燕雀無聲午夢安雨過石潭龍正
臥風迴天漢鶴初盤檣帆日帶楓江色劒匣秋侵玉
露寒未試黃金頭已白閒心猶把道書看

賀游父母公得薦一首

投閒長想白雲峰借寇還應叩九重清比胡威行處
見寬如黃霸曠時逢當官自笑鷹鷂志媚俗羞爲桃
李容更喜風流巡省暇習池騎馬日過從

謝譚侯見吾禱雨有應二首

延頸南園江上天密雲將雨鳳城前千頭並洒花間
濕百道分飛樹杪泉榆莢一春愁寂寂梅林幾路喜
翩翩知君不學樂巴術借得商霖潤九川

其二

等閒枯壤荷君休
汪濊堪銷萬戶愁
改火一朝纔報
夏分秧四月已
占秋山前蟄戶
殷雷奮郭裏
高齋新水流造物
何功歸牧伯
待晴雙鹿夾
轅遊

荒吟

千里緘書問故人
雙魚何事滯江濱
歲華別後全非
舊交態看來半是
新丹鼎藥成應耐
老青毡道在莫
嫌貧門墻不獨侯
芭在句裏閒情可
重陳

西園眺望有感東幼安

世事難論借酒酣
醉來扶策看晴嵐
春花雲路羞尋

徑秋草霜林喜結庵
泗水入邗流海曲
吳山開楚對江南
朝紳滿眼風塵色
靜裡玄言好恣談

冬宵對客論倭警因懷伊亭

不向窓前惜髮毛
還從島外問弓刀
客愁銷借清尊
倒世事談令明月
高肅肅寒城嚴夜
警悠悠滄海傲
吾曹交懽欲盡蔬
盤興絕調猶思白
雪操

冬雨後過山亭東伊亭一首

北風吹雨曉來殘
新霽孤山倚杖看
冷石一團雲尚濕
懸崖十仞屐初乾
潭源水濶臥龍穩
木落林疎棲

鳥寒悵望江天城闕盡閉門何處覓袁安
春杪登臺候鄭丈不至

望入蕪城十萬家歌筵處處醉烟花林光墮地春將
老海色涵山日正華却立懸崖蒼磴穩俯臨長檻碧
天斜鹿門不見龐公杖雲脚空飛玉碾茶

題望海樓三首

百尺樓高睥睨前吳陵形勝似當年東溟下見滄波
盡北斗遙瞻紫極懸江上圖山青不斷門前邗水碧
相連拱文地接雲霄近應有神龍奮九天

其二

巍然崇構傍層臺雄鎮東南王氣開泰岳一峰當檻
落河流千里抱城來倚天寒色看歐劔盤地高標識
楚材最是登臨宜作賦操觚終乏馬卿才

其三

海色蒼茫見十洲乾坤此地一登樓邗溝水落清流
合天日峯來紫氣浮寺逼何妨龍虎會臺高應得鳳
凰遊憑闌不獨覘形勝溶漾澄江好狎鷗

題壽圖

東帛升堂拜母時翩翩仙子下瑤池分甘自笑桃三
穎獻頌遙將酒一卮翔並青鸞雲路遠舞同丹鶴歲
華遲不須結伴雙成去好共慈闈日茹芝

鳳洲公樞回予一病不能吊再詩挽之

輿襯君歸我病時死生岐路不勝悲王程已戒燕山
道使節空傳遼水期三徑竹留人獨坐五樓書滿俗
相疑庭前蕙草依然長不向春風應向誰

其二

對酒探玄亦有年禪機會許法門先無生淨界那期

早脫障紅塵肯受憐知我獨超淪落外論心不復笑
談前含悽尚有人寰累辭去應歸幾洞天

其三

交游風誼自齟年論長惟爭一日先抱璞共君同不
售埋珠單我獨堪憐高談雄辨清風裏綠酒紅燈白
髮前幾度登堂渾寂寞傷心放淚夕陽天

二月九日趨真定校士行次涿州

旌旄高捲塞雲開颼颼春風涿鹿來八郡英雄爭入
穀百年陶冶媿非才孤城日落星軺疾古驛更寒畫

角哀回首長安剛百里幾番歸夢到西臺

次真定喜接涵野公因報以同臺總督之薦

庭院森沈戶自開好風爲送月明來擁衾忽訝淮南
叟傾蓋偏逢洛下才拈筆句成山鬼泣扣弦聲動野
猿哀知君素有封侯志况復威名重栢臺

恭遇

聖駕親詣山陵喜是日午晴時寓定州

閱卷

羽騎森森擁六軍金輿丹旆度山陰昇平兩歲園陵
夢悵望三春雨露心龍去猶看雲氣濕鳳來偏得日

華臨遙瞻馳道塵消處扈蹕無因思轉深

三月定州公署偶述

古塔齊雲對栢臺巍然平入望中來鐸聲遠近門關
肅樹影高低烟霧開階下草青春有色天邊鴈杳信
難裁茂陵多病無人問擁膝長吟祇自哀

和韻

百里烟雲臥海涯日憑詩酒度年華輪蹄市上原非
侶風月山前別是家躡履多緣明世喜扣門還爲旅
人嗟揮毫我欲成佳句自媿江淹筆有花

和雙泉諸君題徐氏樓子菊

老圃秋光久破籬風前奇萼見應稀傳來天上疑無
種開向人間信有機一斗肯容彭澤醉五車定解碧
山圍願題錦字求青女莫散銀花滿露幃

重修望梅樓成和袁壻應舉韻四首

畫檻朱欄百尺雄龍從平地接高空霞蒸西嶽暮山
紫霧捲東溟曉日紅春雨流膏牽水荇秋風翻錦墜
江楓天開形勝興豪傑煉石何裨造化功

其二

千霄樓接楚天雄一望滄溟萬里空蜃市籠烟迷島
黑龍宮含日漾波紅依依蔭合門前柳瑟瑟聲搖江
上楓覽勝憑高思無限開先還說大夫功

其三

傍郭當門小洞開拱文佳麗卽蓬萊青雲已見應期
起明月還看乘輿來採藥千年曾泛海觀濤八月正
登臺廣川舊有玄虛賦高咏真稱玉壻才

其四

危堞層軒一代開鼎新今復闢蒿萊鵬搏遠向滄溟

去鳳至遙從丹穴來白璧故宜稱趙寶黃金何用築
燕臺懸知王氣東南合名世紛紛起儁才

冬夜席上聽妓歌二首

閒情偶憶晉風流喚得新聲滿宅樓禮法暫寬吾放
達鉛華聊借客綢繆花濃屏內芙蓉掩酒盡罇前鸚
鵡愁自愛清歌堪悅耳不妨多費錦纏頭

其二

不將清賞醉秦娥聲色其如絕代何勝錦桃花含日
少轉枝黃鳥弄春多何辭歌闕銷銀燭自許詩成驕

綺羅坐客慙慙他日約角巾攜手小山過

喜再舉子

蓬弧又見葦門懸何幸添丁在暮年敢道雙珠生老
蚌定知羣玉種藍田凋零第宅中霄起冷落弓裘繼
世傳從此閒愁消百種日開尊酒醉江天

壽竹翁黃長兄六十詩五首

六十初逢嶽降辰鶯花正滿郡城春四朝天上歸來
客萬卷床頭老去人霄路尚看黃鵠舉烟波且對白
鷗親石交投分江顏日再拜尊前髮總銀

其二

錦席乘春闋苑開賦題鸚鵡客還來江藩風節千年
色海國文章一代才起草鍾山郎署在投簪南斗使
車回吳陵萬樹紅香滿飄落君家壽酒盃

其三

南極南山入望高地靈天象對人豪一城喜氣來珠
履二月晴光照錦袍漉酒柴桑多種秫謫星金馬幾
偷桃百年攜手風流遠湖海何人獨我曹

其四

蘭珮霞裾雪髯香里中初杖漢廷郎江花早映雙鳧
色海岱今垂列宿光雲護石潭龍暫臥日臨丹閣鳳
高翔醜醜共醉笙歌歇雅調平吟春晝長

其五

弱冠科名早羨君馮唐老去播清芬八千洞裏椿爲
壽六十人間鶴不羣修竹蟠龍生短竹白雲垂練接
青雲攜提花下年年醉蘭氣薰人日夕聞

贈崇川范君

楚璞還須待價沽遠遊聊欲識川途名山到處尋詩

好老眼經時得士無扣缶聲非鳴玉似蟻蠓形豈大
鵬如衰遲笑我甘頭白擊劔燈前看爾呼

小園卽事兼送范君

楓落江城霜葉稀暮烟墟里楚雲低黃花對酒孤亭
上白鶴依人古寺西月照松林山犬吠風鳴葦岸水
禽啼倦遊淮海東歸客歲晚依依惜解攜

賀丁若岡七十

舞衣初試小春天紫氣東來接壽筵綠酒臨風金管
錯黃花零露翠裾鮮曙樓靜聽雞鳴早雲路遙看鶚

薦先最是六街奔走日烏紗白髮看神仙

西園蓋茅屋成

銅柱曾期漢界標閒園今葺數椽茅匝溪燈火連花
徑擁樹雲烟護鳥巢寺近霜風朝聽梵山深寒雨夜
鳴鏡一經窓下兒能讀舊業何妨老去拋

謝文泉王學博穀日招飲

廣文張館簇春筵駘蕩春風薄海天香繞畫屏烟裊
裊暖烘苔逕草芊芊梨園盡日高談歇栢葉分宵雅
令傳歸路一川明月滿清光還似對君前

自述

偃蹇迷途二十年江湖有分得歸田囊空十口身爲
累性懶平生衆所捐放浪形骸天地小棲遲畎畝姓
名全還將餘歲酬微尚高閉柴門學草玄

宿鎮江城隍廟晨起

一宿玄宮境外幽虛堂午夜月光浮山鐘杳藹碧雲
際漏鼓喧闐紫殿頭曉色總憑林鳥報江聲長傍旅
人愁六街依舊乘驄地回首風塵二十秋

對山

隔江千里見圖山愛此幽人不閉關倚杖雲來蒼靄
接開軒日上翠屏環巖深洞好盧敖臥壁峭巔宜謝
眺攀安得壺公來縮地依然移注月塘灣

贈韓醫國西臺

懸壺市上貯瓊漿南斗波流七井香百卷葛洪方獨
異一針郭玉技偏長參花作蜜爭相啖松葉成醪許
共嘗欲贈宋清空券在慇懃聊爾句爲將

近莊邀西臺諸君小飲用前韻

城南乳酒玉爲漿愛客沽來滿甕香紫蕨獨燒桑火

舊詩堂集 卷之三
短白魚雙掛網絲長生涯百畝閒精討世味千般老
備嘗此日放歌須一醉片帆分手又相將

病目懷幼安

鬢毛零落眼模糊山色遙看似有無花塢幾宵春夢
杳命宮三日酒星孤却憐塵世埋荆壁翻恠波光照
鏡湖青白看人懷阮籍一尊還向竹林沽

歲晚雨中辱道尊招飲

古寺溪邊列管絃使君高會雨連天水霜並帶隨車
澤江海全銷遠戍烟覓草蕙生山北郭看花梅在水

南田梨園一曲歸來後尚憶鑪頭酒似泉

喜春晴

朝曦帶雪映吳城望裏搖光素彩生九陌香輪迎細
草孤山藜杖問新鶯芳含白玉梅花冷色弄黃金柳
黛輕莫恨惱人風雨惡年年春日半陰晴

早春懷澄之丈

山亭寂寂曉陰陰咫尺懷人萬里心風雨正堪碁客
過壺觴不向酒徒尋鶯啼谷口琴書靜雲擁柴桑里
巷深若道郊晴方策杖春光拋擲幾千金

春陰懷南莊

早擬春遊過月塘風雲繚繞積陰長錦囊不貯江山
秀白髮空生湖海狂草色芳郊千頃綠梨花別墅幾
枝香晴川蕩漾何時好一片輕帆帶夕陽

暮春雨中西園對酒

杖履新亭日日過遣愁時借莫愁歌春歸不厭壺觴
滿花落偏逢風雨多江上歲華空老大山中生事易
蹉跎一犁早辦城南畢對客依然醉綠蘿

獨出南郊歸途作

寂寥江上暮春遊竟日緣堤看水流老去獨憑孤杖
健閒來不挂一絲愁驛樓天際遙如點山寺波間漾
若浮爲笑五湖塵外客年年散髮弄扁舟

和王元美紅梅吐萼之作

幽姿同冒歲寒霜爲染東風獨擅場瑤島月明流絳
綵玉臺春色醉紅粧客遊吳下驚心早詩過淮南引
興狂欲寄相思無別曲山陽笛裏舊西羗

其二

芳容耀日性含霜品列寒花第幾塲梁苑霏霏仍瘦

影蜀江拖錦獨濃粧香生夢裏春先醉點入吟邊句
更狂我欲臨風橫短笛隔江何處聽吹羌

其三

洗盡玄冬五夜霜冶容淨入少年場橫搖醉態非關
酒細點脂痕不用粧海上干將人已老江南鸚鵡客
猶狂難將嘯咏酬清世雄畧還看早破羌

小園期龔公祖枉集

辟疆三畝枕巖阿曲檻遙分泗水多地接霜林朝梵
響山連墟里暮烟和城頭明月臨丹竈池上清風掃

綠蘿小隊何時來小徑一尊聊和白雲歌

謝龔公祖惠教新刻

漫將巴曲引瑤篇白雪繽紛落九天江上芙蓉渾不
染匣中琬琰最堪憐兩淮經畧三山動七澤文章一
代傳我亦苦吟慙調短臨風空對伯牙絃

夢中得句枕上續成口號

太液池邊金粟黃年年片斧伐吳剛一枝含氣生瓊
宇三種題名上玉堂遙趁天風飛旖旎飽經秋露發
芬芳夢中雲梯爭躡人多少折得歸來是一郎

雨中過北門友人奎老不至賦此柬之
帶雨尋盟興亦豪衝泥不惜短筇勞棋枰星布臨溪
靜酒旆風搖隔岸高浮世逢人成白眼締交當席問
綈袍醉來笑拂腰間佩猶自霜飛一寶刀

壽潘內丈六十詩

博帶衰衣稱身太平江海一閒人不將名字聞清
世獨向鶯花占好春傲俗寰中青眼轉論交門下白
頭新登筵笑問如相許嬌客年年作上賓

顛風中懷澄之維新二丈

底事封姨怒未休號呼日夜萬楊頭擁門落葉寒無
色護野陰雲亂不收暑去空持文質扇憂來好上仲
宣樓白頭聚會何妨數轉眼黃花又送秋

曉望

海日初升宿霧開樓臺隱約見蓬萊雲蒸五色山前
出樹破千林水上來點地露多棲勁草到門風自掃
陳芟曉涼正好閒人臥近水塲邊杖幾回

杪秋十四夜喜月皎甚因懷筆山吳學博

碧天如洗淨纖塵出海冰輪自古今蟾滿欲圓瞻兔

盡簾疎無得到床深盈盈墮地寒浮水歷歷棲鳥影
在林此際相思隔談笑清光猶喜照君心

奎老授職初歸過飲荒園時值午日天且雨

天上歸來捧檄新翩翩丰采照江濱山靈欲向衣冠
笑沙鳥還容几杖親風雨佳辰邀楚客乾坤終古吊
湘臣悲懽併屬浮生事一醉何愁兩鬢銀

夏雨王磐石諸公攜酒小園時有別約

積雨當筵苦濕蒸清風驅暑過山亭晴光照客憂成
喜爽氣宜人醉欲醒隴竹含烟長裊裊石池分水細
泠泠壺觴不盡邀遊興更看羅浮一頃青

雨中歸自新莊因懷樂老

烟郭沈陰黯未開滿天愁色北門來管寧海上身空
老庾信江南賦可哀日晚人稀江市路山閒鳥下石
池臺乘風谷口揚帆便知愛幽眠喚不回

錢儲兩生枉顧南莊

城南烟水似滄浪細雨回風度月塘有客高懷來笑
語無人閒處問行藏井梧覆院垂陰靜河柳沿堤落
影長照地不勞雙白馬角巾丘壑倍輝光

再疊前韻期其再過

輕橈乘興泛滄浪未晚歸帆下柳塘東海
行龍乍起南山霧繞豹深藏郊原自愛秧將徧風雨備令酒
不長舉網白魚新水滿好攜明月醉池光

五月久雨俄見新月時禾苗滄沒過半

江郭連陰日日愁晚看新月碧湖頭疎星暫伴輪全
仄濁霧旋遮影半流縱減炎蒸終苦水未逢搖落已
悲秋塵凡安得神仙術絕粒餐霞臥一丘

西園睡起偶述

疎簾高枕草堂西午夢初醒亂鳥啼院靜風迴知市
遠樹高雲接覺天低雙松歷歲蒼虬古萬竹干霄紫
鳳齊蹊外桃花潭水滿世人應恠武陵迷

夏雨移秧

霄雨聲聲伏枕鳴一犁晨督故山耕短秧新水分田
早乳鴨迴波逗浦輕海上清時謀歲事人間白眼看
勲名秋登酒熟香秔滿取醉何勞問步兵

元日雨中賦

閭里方懽元旦春霏微寒雨及佳辰纔添草木回陽

色更洗乾坤隔歲塵詩酒百年逢盛世鶯花三月屬
閒人青皇早放川原霽山閣迴看面面新

磐石丈留飲戲呈奎泉

戎府秋高偶一過追懽無奈故人何白頭樹下簪花
短清興尊前對月多向夕一枰敲膽破臨風三斗染
顏酡相逢豈用頻防面金石論交誼不磨

苦雨

纔見秋光兩日晴惱人風雨又江城清朝黯黯山前
色長夜蕭蕭枕上聲栢府幾年明滯獄天河八月洗

罷兵叫閹豈爲途窮哭鹵海蛟螭市里行

喜雪期劉子厚王德仲過西園

一白占年望眼開祥風今日海門來老憑耕作供千
畝閒借謳吟瀉百盃醉裏江山看不盡畫中樓閣思
難裁風流雅慕梁園事倒屣懽迎作賦才

閏八月望前一夕客席散後獨坐對月

酒罷棋殘夜色浮滿山明月又中秋重瞻白兔光逾
皎更倒清樽人不留萬井初寒多臥閣百年孤興獨
登樓擣衣遠近砧聲起何似蕭然客潤州

雨後承張南淮儲幼安枉顧新莊
雲山不斷路漫漫雨後蒹葭四月寒臨水客來移艇
遠當風人立怯衣單交游海內百年在意氣尊前五
斗寬青雀更期他日舫好從江上弄漁竿

對竹

夢斷嬋娟老懶生蕭蕭無那隔窓鳴蟠龍細籜環江
宇棲鳳高枝跨海城開徑清風懷蔣翊夾池佳句媿
陰鏗扶疎自笑春容澹終古堅貞保令名

贈臯尹禱天有應

川原不隔頌聲來鞭石回天動九垓琴韻午槐當案
起酒香秋社向山開郡齋獨許清風過公事都憑好
句裁媿我蓬蒿深處隱知賢無路達霜臺

其二

東來萬口說循良百拜登壇禮上蒼誅螟卽看收宿
雨迎龍旋獲覩驕陽五株門外春花滿雙鳥城邊秋
穀香眼見廉明堪怙恃不須青史美龔黃

和韻贈金師席

淮陰共載孝廉船對酒高吟秋水篇萬里河流滄海

接片帆春曉碧空連楚材已見珠明夜越僑還看劍
倚天賓館不同門下客高談應長陸雲玄

秋日王磐石攜酒北莊因呈楊廣文

何處能來激楚歌總戎開席向巖阿乾坤合放閒人
醉山水寧嫌好客過空谷笙鏞驚里閨疎林燈火耀
松蘿草玄况有楊雄在占得秋光分外多

南莊同樂老諸君夜歸

江上烟波不禁人高秋乘興放舟頻望中雲樹青峰
合勢外交遊白首新霜露自憐侵竹杖風塵何意傍

紗巾半曛落日歸來晚一點孤燈照水濱

春雨日辱近翁橋梓攜酒相餉兼及內人

蓬蒿門掩楚天長客有移尊過草堂海上餘寒春剪
韭雨中清興夜飛觴駝蹄山壓金盤薦鷄舌烟燒石
鼎香况是韋賢同燕喜迴波沾洒徧恩光

孟春晦前雨後留戴維新宿時戴將北行

疎燈啜茗夜闌時徐穉連床豁所思春色消磨江郭
雨客懷勾引草堂詩閒心懶問人間事僻性應逢物
外知不醉小槽新壓酒短長亭畔悔應遲

偶述

十二因緣總未除那能蓬髮不蕭疎古今已作終宵
夢天地還成一宿廬白浪看人爭競渡青林待我獨
逃虛關門令尹何從識滅跡先藏薄板車

友人邀至沈園閒酌更有所期

客子招尋過草堂命官今日酒星光傾壺色淨清風
滿落子聲高白晝長湖海無人生睥睨乾坤有地著
疎狂明朝北郭乘春去東道懸知倒屣忙

枯樹寒鴉

森沉寒樹集昏鴉雲冷疎枝墨未遮隱隱林梢千點
小蕭蕭風外數株斜霜毛欲借昭陽色凍眼思窺上
苑花暫止不隨籠鳥繫羣飛自啄海邊沙

過西園

不惜青鞋海上遊春光多在郡西頭水聲遶郭長橋
接黛色連雲小閣浮萬里風烟雙過鳥百年天地一
登樓人寰何處非容我獨伴詩書老故丘

小園絳桃盛開同禹翁岳丈暨懷竹諸兄小坐
把酒臨風興不窮絳桃花放滿園紅霞緋一片看難

盡雲錦千重畫未工喜氣總緣佳客別賞心還與衆
人同盤桓更愛孤芳好偃蓋青青澗底松

過懷宇丈對局

雨陰日日熟梅秋雨後林光黯不收去怯杖前苔徑
滑病憎衣上濕雲流散愁車過層軒敞決勝枰開小
洞幽何意主人頻敗北一尊重約習池遊

其二

清世閒人一局棋草堂僮僕鎮相隨浮名不掛青山
色好客還生白玉姿歌動香飄爐氣遠算多枰落子

聲遲忘年懽笑蔬盤外長日淹留暑不知

夏日留客

小排朱夏續餘懽送酒南隣十斗寬赤日照盤空首
藹清風飄席滿琅玕百年意氣爭看劒五月炎蒸欲
卸冠安得金盃深貯水白龍皮散一堂寒

十三日雨雪中飲劉中橋宅上

點點紅梅春雨香六街車馬爲燈忙臺池獨映蓮花
色烟火還生明月光捲地風雲飛亂雪拂天簫鼓動
清觴隔門拚取良宵醉縱犯金吾也不妨

對雪

隨風旋舞上欄干，片片疎簾帶笑看。
瘦骨正宜新鶴斃，閒心還憶舊漁竿。
鑪頭酒熟香初暖，坐上詩成筆未寒。
百里豈無僵臥在，何人車馬問袁安。

山園幼曦幼度攜酒過集

名園不厭客頻過，斗酒還攜馬仗波。
雜樹鳥聲啼宛轉，平臺石勢立嵯峨。
臨風欲學花前舞，見月思成醉後歌。
高誼平生推二仲，綢繆猶覺歲寒多。

和擒賊詩

指揮幕下出神兵，不戰奇功計自成。
嚴警霄中魚鳥陣，凱歌江上鼓鞞聲。
行春小隊懽生色，報德豐碑老著名。
佇看玉墀親授鉞，劔鋒遙拂塞塵清。

題避塵館

避喧長傍小岩阿，車馬從教里巷多。
一味自甘閒是計，萬緣都識妄爲魔。
風簾晝靜爐香細，花塢春明樽酒多。
我欲山前分半席，老狂高咏紫芝歌。

寒夜與儲十二輩小坐

擁鑪相對草堂幽，話到人間事事愁。
客裏黑貂逢季

哀尊前縞帶見王褒驅車半是窮途哭秉燭全非永
夜遊笑負杜康還一醉共邀山月過南樓

冬日枉近翁諸老及任甫幼度小坐

梅花纔放小山阿折柬相邀少長過紫氣帶來藜杖
滿青雲還傍角巾多攻文席上逢開府破虜燈前見
伏波業在行藏須及早人間歲月易蹉跎

喜晴過西園再柬唐別駕

雨色冥冥破曉烟舉杯江上問青天應憐河決經三
載詎使花開空一年虛閣捲簾看霽日曲池倚杖聽

鳴泉頻過莫厭山厨瘦細笋新茶勝玳筵

夜坐有懷因寄鄭東泉

明河清淺照江臯爽氣空庭薄紵袍雲淨新秋淮野
濶星疎深夜楚天高兩朝臺寺名猶在十載江湖夢
亦勞老向山人問真訣欲求大藥伐吾毛

西園新啓南扉

城南佳麗望中收水遶長淮入徑流玉閣青霞朝日
擁碧湖芳草暮烟浮落花一片春將晚啼鳥數聲山
更幽攬勝誅茅寧獨樂祗應未許俗人遊

壽幽翁李姨丈夫夫婦七十步韻

歌鐘餘月動寒鄉偕老筵開客滿堂松偃霜枝依竹
祖梅傳春信報花王瓊漿久漱瑤臺侶彩服長趨青
瑣郎爭美芙蓉元並蒂百年同醉紫霞觴

偶同客登玉皇閣

瑞雲香霧繞珠庭高閣閒凭萬柳青短杖石壇過福
地疎簾玉座禮神明益州未化沙邊鶴太史還占海
上星興盡棋殘歸路暝山花寂寂水泠泠

久雨約劉鳳阿李春園相過

雲暗吳城鎖積陰郊原空負踏青心江花含態愁將
老岸柳攢眉恨不禁何處晴光金可買誰家春色酒
堪尋孤山好客還應到新水成渠總未深

寄丁少鶴鄉丈

飛鳧早向越中知跨鶴今看獨立時腰下何曾纏朽
貫人間每自播新詩月鳴久擅青田價霄舉遙憐白
雪姿顧盼深情難可報秋江雙鯉寄相思

俚句辱竹翁相和復此答之

照眼水壺日對君驚人險句復空羣波翻碧浪鳴千

壑色映瑤天護五雲郎署勲名才獨擅漢廷詞賦價
全分鼓琴莫道知音少流水高山次第聞

夏日過南莊

鶯花市里競春杯隴麥逢秋別墅開繞室仙風天日
近隔江山色海陵來烟含榆柳清留戶日照蓬蒿鬱
滿臺去此爲誰閒釣艇一竿垂地長莓苔

夏日對花遙賦

湛碧池前花滿臺參差猶向望中開懶呼扶老看將
去笑遣奚奴折得來赤日到門書總廢清風當戶句

還裁閒庭漫興微吟起白鳥雙雙下綠槐

夏日小樓讀李于鱗白雪樓刻

燕寢凭虛也自幽午天長日片雲浮入窓塵外清風
閣一卷寰中白雪樓丰骨曼隨東嶽立波瀾迴向大
江流高才陵替堪成嘯宇宙鴻名總爲收

登一覽臺懷澄之鄭丈

高眺危樓倚白雲青天搔首問離羣西來山色平岡
見東去潮聲薄海聞露下霏微蘭氣合風前咫尺鴈
行分層樓剩有盤桓地細蕪爐香日待君

近翁和韻過望小兒隨年奉謝
桂枝曾接子猷攀三十年來擬再還
明月良宵通好夢清風佳句破愁顏
蠶池作繭當三起豹管窺文得一
斑顧盼敢忘轅下惠成名歸拜法筵間

夜雨早涼期友人一坐

一雨虛堂夜爽生陰雲朝起護前楹
涼飈萬井回炎海清夢三更到赤城
簾捲烟光看去薄衫含秋氣着來輕
殷勤莫負佳辰約酒在尊壘棋在枰

過南莊

數椽疎豁月塘灣乘興來尋半日閒
潮落暮江沙帶碧霞生秋樹錦成斑
團團宅蔭陶潛柳面面窓開謝眺山
安得此中長煉藥帳前雙鶴見丹還

送杜漸川之任南昌因寄萬思默

宦跡因君憶舊遊豫章樓閣似瀛洲
湖南高士方清望海上閒人已白頭
辛苦十年名省佐炎蒸五月大江流
微官籍有提攜在極目松蘿喜氣浮

過西園

杖履秋晴到草堂殘荷猶泛一池香
籬花識主還應

語山犬迎人故欲狂亭轉竹陰林日淨閣連湖色海
天長行行獨立風前笑蒨蕪丹皜照眼黃

省斂

萬木蕭森別業邊晚秋觀穫到南田馬迎山色掀征
蓋棹轉蘆花沒釣船層漢風高黃鵠舉晴江波靜白
鷗眠囊中檢點防來客沽酒剛餘阮氏錢

盛夏去南壩新莊與東橋偕往途中作

帆下長河七里灣青天不動白雲閒中霄日赤郊墟
淨高樹風清鸛鶴還潮入壩南通楚水屏開江北見

吳山相逢正值平生契一路軒渠破苦顏

對蠟梅

倚杖看梅江郭清日蒸山氣暗香生萬英細綴枝非
弱一葉不留花更清喜對巔毛飛雪色愁聞羗笛出
林聲風流亦有羅浮客月冷霜寒夢未成

歲暮西園對客

馳驅不似世人忙挈客冬遊過草堂千里河山寒映
月一園蒼翠靜飛霜探梅共問春何在對局從知日
漸長水遶溪深歸路黑隔橋殘雪帶林光

春日辱徐太學渭野招飲

公子風流愛客過
筵開畫閣景偏多
月明如水臨朱箔
春色隨烟上綠蘿
別院徑寬容駐馬
高門日落待揮戈
梁園况是羣才會
吾老何妨倚醉歌

沈園同後蘇戴諸公對局晚歸

烟薄風微霽日生
中春一月一朝晴
閒庭鳥下迎人喜
別院花開隔竹明
沽酒媿無東道主
彈棋幸有北山盟
相逢共笑出門去
空爾慙勤惜別情

陪郡父母飲有作

錦筵初泛紫霞杯
一郡循良擁蓋來
海上臥龍隨雨起
甕頭浮蟻及春開
碧雲搖曳歌聲繞
珠斗蒼茫劍氣迴
潦倒却慙賓從末
醉中猶自諱霜臺

寄敷翁詩伯

斗南虹氣劔川開
血汗神駒海上來
白雪人傳三謝句
青雲庭毓兩虞材
滕王閣近連淮水
楊子江空望楚臺
早晚法門官裏過
百篇搔首待刪裁

其二

日照芙蓉霧眼開
五湖秋水豫章來
從今淮海無名

有美堂集 卷之三
四
筆自古山林有大材濟代總歸新皂蓋識途空老舊
烏臺清芬遙揖曾遊地千里緘書句漫裁

萬曆二載中秋同澄之維新作

開筵對月中秋夜四十年來笑語親圓魄徧懸愁樂
地清光長照古今人壯心如昨忽俱老舊好逾時翻
更新安得海濱逢樂歲優游湖上共垂綸

近翁招飲唐雲翁別駕不至詩以促之

作客西隣月滿天媿將衰齒壓瓊筵不逢笑共梅花
語空使香焚寶鴨烟誼重朱陳人已老交深管鮑世

應傳忘形久拜高風下底事良宵負酒泉

王近翁惠棣棠花奉答

刺史名園棣萼新數莖移插到西隣翩翩忽動連枝
咏荒落俄添二月春色借祥花金掌露香分瑞葉玉
堦塵他時上客來懽賞五馬雙旛舊主人

謝竹窓先生詩

九折芳名海上香無勞問姓識韓康神功舉指憑雙
眼春色隨筇載一囊藥會補天躋華扁酒能中聖到
羲皇銜恩不獨孫枝感濟世因君願總償

送王紫源父母陞任安慶

班馬朱纓紫玉珂
離亭尊酒對悲歌
名收白簡羅才盡
政佐清風入頌多
天柱有峯飛羽蓋
海陵無月照烟蘿
皖城一派長江水流作
邗溝去後波

見邸報論高寶河防時堤完苦雨

長堤築後來風雨
人事難回天怒號
青草日埋江岸短
白波時捲雪山高
漁陽空覩盈疇麥
淮海翻驚四月濤
珍重河防周柱史
更題板築兩崖操

秋日同友人往沈氏莊居

望望蒹葭秋水深
漫遊不似少年心
持觴話盡田家苦
倚棹聽殘漁父吟
此日伏龍成懶慢
當年司馬憶招尋
片帆歸路看新月
露濕輕衫風雨襟

同杜君實東行晚歸

孤帆歲暮泛江津
不惜霜華兩鬢侵
山氣拖雲橫曳練
水光浮日碎搖金
相憐病後論交久
自笑生前慮事深
無酒可供河上醉
踈星明月夜歸心

賀雉臯太尹祈禱有應

百里懽騰擁雉臯
神明茂宰爲民勞
陰陽縱閉三時

苦天地平成五稼高化洽自生芹藻色政和應覩鳳
凰毛白頭扶杖瞻鄰壤欲向餘波濡一毫

寄謝華明經連泉

交情生死海如深尺素聊緘一片心搦管當年期化
玉披裘此日見辭金鳳凰臺迥江流遶薜荔園空霜
月侵懷德思君倍惆悵白門寒色正蕭森

正月三日雨酌座中時有八客

傳柑滿座客飛觴風雨年年舊草堂燭帶夜光花倍
爛酒沾春氣甕逾香締交自可輕寒暑混俗何須問

短長待霽郭南開別墅扁舟乘月咏滄浪

謝懷慎丈留飲

太平江海剩閒心攜手逢君感興深欵曲每開花下
宴風流長發醉中吟堅珉悞擬荆山璞良產空懷越
地金爲語春殘尋樂者鬢毛全被曉霜侵

送奎老分教江浦

劍氣衝星老未銷冷官初拜近重霄青芹碧水春飛
雨明月空江夜聽潮一代聲華推重地千年禮樂翊
清朝獨憐得句知音少觴咏何人慰寂寥

西園晚穫

撲面湖光風色輕高原閒倚碧雲生
插天獨立青巒曼背日雙飛白鳥明
清世應無江漢夢浮生還有歲時情
月明墟里人烟少蘆荻蕭蕭戍鼓聲

人日邀鄭澄之諸君觀春二首

芳郊綵仗簇花新雲擁勾芒到海濱
天上正逢開霽日人間同領太平春
樓臺色映千門曉士女香飄九陌塵
東道短筵誰是主絮袍蓬鬢舊臺臣

其二

剪勝縷金處處新最靈辰喜宴江濱
半天寒日留殘臘五夜溫風送好春
浮世有人惟白眼香街何地不紅塵
漢宮此際開長樂歌舞千年祝遠臣

冬夜攜室人過岳翁宅卽事感懷

重門深院不聞更到枕寒鷄三兩聲
海日未生東閣曉風燈猶照北窓明
酒闌興盡懽初合衾冷香銷夢不成
還喜十年投珮後同車依舊過蕪城

仲冬十二日阻冰維揚

計日安流速去程無端羈思滯蕪城
霜飛永夜千林

肅凍合長河十里平勝里烟花聊寄興故園風竹重
含情陽和好射蛟冰斷早送歸帆月下行

留竹亭張翁小飲

偕老盟成燕喜開翩然仲蔚草堂來五絲不用全憑
卜雙璧何須別選才爐氣氤氳人自醉歌聲繚繞句
還裁褰帷遠送霜天月列炬干霄見上台

冬夜順泉張丈招飲芳園賦此以謝

勝里名園壓辟疆崇山疊疊樹蒼蒼庭空覽盡中天
月閣煖銷殘永夜霜青瑣夢回雙闕曙白雲身臥萬

花香憑陵一眺風塵外未醉華筵興已狂

山莊六首

雜遝囂塵駟馬中何如溪上一帆風百年浮世元如
寄萬劫勞生總是空水暖鴨頭翻藻綠江晴魚眼射
波紅早春賸有湖山興翠黛青瀾看未窮

其二

盡日春衫蕩漾中輕寒猶怯夕陽風霜鳧避弋深藏
渚野鶴盤雲半入空新水一篙萍葉綠疎林幾樹槿
花紅孤帆挂遍天南北不向人間泣路窮

荏苒年華六十中
喚愁江草又春風
久知塵世千般累
且對雲窓一隙空
白髮難將仙液黑
赭顏易借市沽紅
幾回欲傍天台老
迢遞雲深去路窮

其四

金縷初黃二月中
暝烟飛散柳塘風
杖藜自笑蒼藤健
對酒惟愁鸚鵡空
羅綺晴嬌春水綠
詩篇夜剪燭花紅
百年老眼長途豁
獨笑疎狂阮籍窮

其五

駘蕩乾坤百歲中
若耶溪上舊春風
亭亭淺水新蒲長
落落疎林宿鳥空
遲日滿山嵐氣紫
芳郊二月草芽紅
白雲天際人千里
岐路東西望眼窮

其六

浮生計就五湖中
瞬息歸帆半日風
四野雪消春水長
滿船月上暮江空
霜飛掩映梨園白
霞散參差杏塢紅
詩思芳郊千萬狀
錦囊收拾未應窮

艤舟廣陵王將軍邀飲未晚別去

秋光不爲隱淪銷
問水尋山興轉豪
已買百年瀛海

棹還觀八月大江濤
芳筵對客風流滿
落日懷人俠氣高
乘夜放舟明月去
淒淒白露點征袍

寓郝園

園開三里傍芙蓉
不在烟花市里中
湖海清時來郢客
乾坤閒處醉山翁
一庭寒色梧桐老
百里秋聲蟋蟀同
漫倚壺觴懷地主
笑談曾此面春風

郝園漫賦

邗溝南下此長河
乘興高秋掛席過
地接霜林天語近
路連客館使星多
蜀岡山色浮青靄
揚子潮聲湧

白波不遣西風吹
旅髮滿園蒼翠日
婆娑

去郝園

宦遊曾此醉岩阿
懷舊猶思枕薜蘿
三日主人還未識
百年浪跡亦空過
垂簷樹密清風少
倚檻花殘亂石多
避地漫攜孤劍去
好山深處任狂歌

借居卞園未果

悞疑車馬訪沈淪
金石何人不易心
漫道稽康從俗懶
也知顏闔臥雲深
燕關楚塞猶同舍
明月清風只隔林
半面靈山曾識我
好聽秋夜白頭吟

寓秦園

爲憐筠館傍山清忘却譙樓接郡城五夜鼓聲鳴不
歇一床蟲響夢難成乾坤何處容歌嘯塵世無人問
姓名風雨通宵更愁絕曉看霜雪滿頭生

寓文樓園

窈窕林深不染塵辟疆高臥白綸巾羊蹄草碧驚心
舊龍爪花紅入眼新地闢名山留勝蹟天開好景待
閑人客遊不必悲秋晚握手論交處處春

懷歸

海上依然一畝官數竿修竹引清風旅遊無地容棲
鶴歸思何緣欲借鴻彈鋏肯干公子貴題詩應任老
夫雄幽棲自是臨淮好龍劍西風馬首東

定居

漫遊不帶買山錢偶欲移家水石邊豈愛花明猶錦
里惟憐鶴喚似青田五湖客對孤舟月三月人懷一
井烟自探囊中惟短句笑留空券作腰纏

偶感

江鄉正憶蟹初肥旅食邗城幾日歸梧葉風高天日

陸葦花秋老月塘飛故園物色逢時好浮世人情到處非此去盤桓從所欲南山豐草北山薇

讀南華

鄉思縈迴一水分客堂終日見流雲長松覆院生孤色好鳥投林下幾羣涼氣霏微山閣入雨聲蕭颯夜窓聞開函漫讀莊生語物外逍遙正似君

苦雨

夜雨連綿曉不休聲聲滴入客眉頭授衣未辦霜前冷穫稻應添水後愁八月秋光空遇閏千山詩興久

妨遊蒼藤何日扶新霽題徧蕪城十二樓

舟行遇雨

長河風雨夜蕭蕭涼思孤舟攬黑貂驚枕數聲秋夢短打蓬千點客愁饒雲棲遠樹寒孤鳥水長平津沒小橋安得陽鳥高萬丈滿江晴色送歸潮

舟行遇雨懷宇文限韻陽字

不鞭陰石欲鞭陽落落歸舟客路長兩岸樹聲風歷亂一江秋色雨微茫夜床朋舊何人在晚歲馳驅底事忙坐惜壯心成白首幾回青鏡卜行藏

將到吳陵先遣歸報
五兩風回細浪平雙飛仙鷁指吳城丹楓楚岸驚秋
老白日圖山送午晴喜氣懸知簷鵲報好音先付塞
鴻征閒愁盡遣頻沽酒滿篋搜詩對友生

懷鴈

朔鴈常年此日過汀洲寂寂思如何稻梁豈識淮南
少羅網應防海上多悵望孤雲江漢影遲回落木洞
庭波南來早送關山信香閣人停月下梭

晚步

容膝行迴曲徑盤亦分明月到闌干清留瘦杖生秋
健爽入輕衫起暮寒白髮日於浮世遠青天夜向小
齋寬還攜孤興邀諸少蘋蓼江頭理釣竿

近翁有詩謝送江魚爰和來韻

白髮滄江欲暮天西臺猶憶舊時燕夢中久失江淹
筆湖上同歸范蠡船老佩吳鈎還自哂醉吟巴曲豈
堪傳留連不厭頻來客最是孤山風月仙

懷西園期樂軒鄭丈

咫尺山谿阻嘯歌虛亭長日綠陰多門閒芳草鳥還

下池滿清風客未過雲起藥爐封几杖月臨書幌伴
藤蘿相看更有虹橋約一片香泉浸芰荷

又柬幼安

買田洲上傍羅山一葉隨風自往還塔影孤懸江國
路潮聲深落海門關黃魚紫蕨秋應熟濁酒新詩日
正閒地僻無勞車馬過獨栽叢桂待君攀

題新城古堦

峻塔巍然一水東舉頭塵世半天中紫霞東海長迎
曉白鶴西山遠下空地自何年開勝蹟人於此日振

高風月明露白清秋夜滿酌孤吟興不窮

北郭看田一首

東風一棹下江天夾岸飄颻酒旆懸市舶瀕河人磴
磴漁歌向午鼓闐闐清時滷海棲岩谷白首青山種
石田浮世榮名我何有憑棋爲日酒爲年

雨中對羅浮

塔下新城四水環中央突兀小羅山洲隨芳草年年
長鳥共孤雲日日還塵世人多雙眼在滄浪客自一
身閒冥冥暮雨烟波夕隔岸籃輿邈未攀

對芍藥期韓伴松

紅藥初開曜景長
暖烘花氣逼人香
鶯窺芳艷啼先老
蝶趁輕風舞倍狂
時去尚留春色在
身閒還爲俗緣忙
年年辜負清尊賞
此日期君入醉鄉

十三日夜獨坐

六街今夜試燈初
邑里蕭條只晏如
山郭未昏鳴禁鼓
市塵何處逐遊車
樓臺暗鎖歌鐘歇
羅綺空嬌舞閣虛
獨有江城明月好
清光還照案頭書

十五夜邀友人小坐

依然湖海兩綈袍
把酒相看月色高
千里昔時皆駿足
百年今日總霜毛
青萍醉欲當筵舞
白雪狂多對客操
佳節不妨隨俗賞
擁門烟火集兒曹

十八日觀張中軍牡丹屏風燈

市罷還張白下燈
畫屏國色欲傾城
丹葩爛放霞橫捲
翠葉輕搖風乍生
寒箔不鈎飛紫燕
春山待雨聽黃鶯
淹留未盡東君興
漏鼓催人轉二更

陳如岡中丞北上過荒園賦此贈別

三徑春深長綠苔
青雲忽擁白雲開
雀銜片片梅花

去人踏重重山翠來江海烟波容釣叟風塵岐路識
題才孤帆明日天邊客夜夜思君望上台

小軒閒對

別業營成處處幽
翛然境逼萬峰秋
隔簾臥見庭中樹
扶杖行看水上鷗
竹葉獨憐彭澤醉
桃花不羨武陵遊
人間多少尋真地
何事蓬萊十二樓

舊業堂集卷之四

吳陵凌儒真卿甫著

同韻劉希周思兼甫選
曾孫凌國靖建中甫訂

詩 七言律二百二十八首

春雨連綿憶西園

何處春開錦繡場
海邊風雨日林塘
梅粧洗遍渾成白
柳帶吹殘半欲黃
杖履看山空自老
壺觴邀月共誰狂
晴光若許遊人買
買盡黃金也不妨

讀劉道長封事

春江閒伴白鷗眠偶讀遼陽疏一篇國是欲明黃閣
下天恩還賜紫宸前片帆川上清風滿匹馬城頭
皎日懸十載疎狂霄夢斷對君猶自淚潸然

夏日西園對雨

颺杳涼生五月秋送梅黃雨過山頭冥冥樹黯林中
色脉脉池通檻外流書潤一床楊子宅塵銷百尺庾
公樓淋漓喜足分秧水不住還添漂麥愁

答崇川曹于野公遣令器遺以佳刻佳織

雙魚遙見故人情寂寞孤山喜氣生照眼百篇秋水

色發函千縷錦江明鶴巢海上松華老鳳起庭前雲
路輕攬勝東來霜降後滄波定訪白鷗盟

送吳學博還臨川

彭蠡清風短棹過倦遊歸興向巖阿去偕苜蓿盤前
客來放滄浪江上歌秋色園林朱橘好春流杖履玉
泉多懸知子弟樞趨暇遙對芙蓉醉綠蘿

賤誕辱袁壻邀飲詩以謝之

短袍白幘戴堯天草木山中又一年時以採薇呼石
友日因沽酒檢囊錢身閒不問人間事行健還疑地

上仙歲歲慙懃煩玉壻錦筵紅燭瀉新泉
張龍門遠訪賦此奉寄

半畝宮開雲水中山人孤興落淮東帆檣百里客初
到風雨一天秋正中司馬自憐遊宦倦虞卿何事著
書窮攀權不及治杯酒悵望江樓明月空

再挽磐石

向平婚嫁初完日長嘯仙遊歸洞天覆水不收真偶
爾落花無語竟悽然死綬壠上同荆杞斷織堂中共
几筵總爲終天傷子壻白頭淚盡寢門前

挽士登蔣大叅

安邊無命答新恩千里河流送旅魂交道已傷今日
盡師模猶仰昔年尊百城斧鉞留南服三輔旌旗在
北門耳聽江鄉身後論幾番衫袖濕啼痕

謝幼度誕日招飲

德星高並壽星光錦席初開五世堂畫檻朱簾寒不
捲玉缸春酒美堪嘗棠花壓盡江城盛蘿蔓牽將海
日長談笑滿筵諸少客獨叅垂白一疎狂

久雪喜晴和後坡韻

幾番淅瀝引詩狂
曉霽尤憐積素光
清逼日華搖筆
冷暖烘風色
上衣香玉壺
殘雪開江閣
鐵杖先春過
野塘乘興不妨沽
酒盡市橋還典紫羅囊

登山東鄭澄之

片石凝華凍未消
冒寒扶杖過虹橋
新移雙栢平臨
頂亂插孤峰半在腰
泗水西環江郭近
蓬壺東接海天遙
躋攀筋力君猶健
步履時過醉一瓢

過袁仲子再柬

齋居咫尺小山阿
客裏花前日放歌
文似楊雄耽寂寞

冥酒逢袁紹
慰蹉跎柳邊校獵雙鷗落
林下尋師二
虎過爲惜高才兼絕技
老懷開向少年多

秋日對客

愁劇凭高且放歌
錦林黃葉滿烟蘿
詩成不負秋山
好客到何妨
市酒多風竹搖
青疎可對霜松含翠老
堪摩人生底事空勞瘁
一去無情江上波

薄意奉奎老侑以口號

窮達無心一任天
詩懷酒興過年年
給錢歲倚蘇司
業聯句時攀李謫仙
短髮數莖還自染
長軀七尺更

誰憐也知安石東山日意氣相隨有阿玄
雪霽早登山懷澄之丈

映天晴雪照江城望裏朝烟片片明帶凍成花留樹
久隨風飛絮點衣輕千林淡日光逾淨一徑寒山爽
自生遙想如雲封谷口高眠此際夢魂清

晚齋獨坐

悵望寒山空翠屏江城風色晚冥冥呼盧暫廢千場
戲剔蠹聊酬半日醒髻着閒愁渾是白眼逢薄俗不
成青黃昏佇立無來客指點梅花香在瓶

再題古塔

高標十丈插青天住世長留塔影懸鈴鐸無聞僧語
少舩航不斷市聲闐星分七井開雄鎮雲臥孤洲買
瘠田最喜結茅棲止近水光山色共年年

同諸客賞牡丹

妖姿雅稱百花王獨擅風流第一場霞映醉容春酒
滿日烘香氣午烟長閒情不作巫山夢好句還傳御
苑芳題筆忻逢諸少在臨觴一任老夫狂

首夏朔日東子厚

青陽律轉是朱明已見荷錢水面生海日當空槐蔭
薄池風入院柳花輕人間自取千場醉鶯老猶聞百
轉聲寄語東鄰劉越石天長虛閣好談兵

山亭秋夜同幼度任甫子厚對月

懶慢山中一事無獨憐秋色日攜壺扶筇絕壁星堪
摘對酒青天月可呼排漢薄雲紛吐葉點荷香露細
垂珠庾公雅興南樓後千載風流好屬吾

七月九日池上召客有二客不至賦此嘲之

臨山把酒醉新秋蓮浦無風香自浮笑問青天月何

在喜看滄海客長留上方隔水時聞梵絕壁侵雲暮
倚樓却恠高飛雙白鶴不棲珠樹欲何求

早春鎮江陳隆石枉顧西園賦此贈別

臨淮有客訪幽棲細草春山長未齊寶瑟遠遊澄海
上角巾相對小湖西片帆風雨成來往一路烟花入
品題他日過從秋色裏滿江明月共君攜

首夏薄攜過袁仲子

顧盼誰能雙眼青一杯山館慰飄零坐談交態氷生
席行傍花陰月在庭喜遇晝長還夜短忍看人醉獨

吾醒泥蟠歲久天飛近雷雨潛虬起北溟

西園與奎老對酒

滿山紅紫鬪芳菲對景開尊蛤已肥人老但知身退
是興豪寧恤酒狂非鳥來對客當堦下花落隨風隔
院飛相送柴門更定後月明堪伴杖藜歸

雨後山亭晚坐

細竹高松接翠屏百年今日對孤亭湖光久受山雲
白草色初經江雨青忙向風塵何日了醉從人世幾
時醒欲彈流水閒中調只恐魚龍靜夜聽

暮春雨中西園對酒

杖履新亭日日過遣愁時借莫愁歌春歸不厭壺觴
滿花落偏逢風雨多江上歲華空老大山中生事易
蹉跎一犁早辦城南畢對客依然醉綠蘿

新正二日邀錢商卿諸君小坐

懽笑初開第一筵春風依舊草堂前金樽滿酌正元
酒銀燭高烧子夜烟獨倚締交銷老景相期買卜問
豐年里中今夕聊成聚不必星官奏九天

暮雨中與李惺籛園門惜別

卷之四
張望平園十畝寬清言閒對楚江干雲含密雨千林
晚風動疎枝獨鳥寒蕭寺北來山寂寂蜀岡西去水
漫漫買舟又指金陵路明月相思兩地看

送李惺遽歸金陵

鍾陵雲樹望中明酌酒送君南浦行千里束芻慙孺
子一身孤劍識先生白門潮落寒江小采石烟開曉
日晴攜手何時傍山閣春風二月早聞鶯

別李惺遽歸金陵後一日作

更定霜空聞鴈聲月明今夜照蕪城解鞍落日沙邊

宿挂席長風江上行六代衣冠傷故壘九天宮殿夢
神京重來已訂臨淮約坐看春湖新水生

歲殘時雨分曆

山城雨洗六街塵送舊還迎歲月新帶濕數聲雲鴈
曉衝寒幾點鳩梅春黃金未熟爐中火華髮爭垂領
上銀玉曆頒恩分滿里太平同作帝堯民

歲盡憶梅花卽事柬劉子厚

塢裏寒梅紛破英相期對酒話平生馳驅又了一年
債慷慨空懷萬古情領髮漸非丰骨在人心不改歲

時更小山回首春無限還與鶯花踐舊盟
晚過灣頭望州城之作

南北馳驅空自忙逢人不欲說行藏鶯花夢杳孤懷
黯桑梓愁深兩鬢蒼風順鼓聲來岸遠日斜帆影落
河長東歸好取春園醉簾燕雙飛問字堂

月下書懷

嬋娟皎皎白于霜緩步中庭漏鼓長數九天如三月
暖就衰人似少年狂青藜到處乾坤小彩筆題時山
水忙清世林中多少樂採薇何用姓名香

新秋園上與子厚諸君晚坐

晚涼虛閣坐從容隔竹遙聞寺裏鐘溝水一泓拖似
練雲山幾片削如峰驚心蟋蟀吟秋早醉眼芙蓉綴
露濃咫尺人間仙侶滿何須天路復相逢

初冬客舟中辱文樓昆仲攜酌爲鈔關阻遊

邗城孤興寄扁舟聯壁攜尊江上遊當徑有花人未
採出關無路月空留清霜欲傍蒹葭落短燭還催鷓
鷓浮送別官亭更漏靜玉簫遙聽在青樓

初冬陳后泉招飲高園時聞邊報

倦業堂集 卷之四
九
傍竹筵開江上亭小春重得對山靈日斜偏映千林
碧霜落猶看萬樹青湖海久淹人易老烟花長醉客
難醒疆圉欲靖收名將雷雨潛虬起北溟

初冬日晚放舟還泰

役畢東還挽夜航同行有月伴淒涼江空倒映一天
碧日落斜飛千樹黃秉燭舉觴淮酒美爇香開卷杜
詩狂馳驅歲暮成何事歸臥城西舊草堂

冬日西園邀凌二洲邑宰小飲

習池佳勝傍巖阿山簡風流不厭過滿地寒花萋露
草一天明月掛烟蘿雲籠旭日鳳凰起霜擊高空鷹
隼多欲徙昭陽就君住水清時得濯纓歌

挽宋見湖令尹

謾辭塵世作仙遊咫尺憑虛到十洲萬事總於今日
了百年真是此生浮門前流水空添淚隴上停雲暗
結愁欲傍蒹葭訪踪跡湖邊飛盡舊時鷗

又挽

珠沈璧毀惜高才百里悲風海上來鳧鳥不飛雙翼
冷玉琴空在七絃哀淒涼素幔霜侵戶掩映丹旌月

上臺 聖代循良堪入傳他年太史爲君裁
寄常熟沈星吾大尹

江南江北幾重山茂宰神明不可攀
流水有聲官舍靜落花無語訟庭閒
五雲天上看鳧去千載人間見鳳還
從此台垣沛霖雨細分膏澤到柴關

誕日自述

犬馬虛過又一年當筵稽首對堯天
斑衣歲獻堂前酒白髮春耕海上田
招隱共扶攀桂杖好遊長畜買舟錢
青山未了詩書債短日催人理舊編

誕日西園速客

臨淮歌舞映長庚杖履雲從見客情
歌遏彩雲飛不散舞迴銀燭煖初生
孤松晚秀南山色一水寒流北海聲
正是新亭落成日欲將扁額乞嘉名

贈王文泉學博兼懷乃兄九難年丈

邗溝疎柳夾河流綵鷁雙飛曉霧收
官拜新恩滄海去人懷舊侶曲江遊
春風鶴立桃花塢明月鴻歸芳草洲
相對夜床休戀別洪都山斗倚旄頭

西園登臺東望

長松高閣倚青霄彷彿蓬萊弄玉簫紫氣東昇滄海
日白波西落廣陵潮樓臺滉漾金銀湧島嶼參差烟
霧饒老惜人間骨難換漫從雲水自逍遙

韓伴松邀飲時大雨生涼喜而賦謝

對酒松陰日未斜龍鱗香散半天花水泉長伴神仙
座風雨俄來柱史家滉漾瓶開始射露廉纖標舉赤
城霞還丹疑得韓庚訣七十相將髮始華

謝良醫徐小洲

臥病滄江舊業堂迎醫海上遇長桑囊中盡貯仙人
草壺裏多盛玉女漿煉藥不求勾漏令舉針能用華
佗方感君厚誼投詩贈泉水應添一倍香

送張順田還揚州

興盡山陰夜返舟片心隨水逐君流扶攜空有孤生
在笑語何能十日留冰雪共憐殘臘別烟花重約好
春遊黃金散盡還應聚莫遣閒愁早白頭

至後與劉子厚夜話

疎燈子夜獨堪親細雨清言對故人啜粥氣蒸銀盃
滿飲茶香泛玉甌新一番世事尊前盡幾點寒更漏

下頻此日微陽葭管動東風回首草堂春
西園避客讀老子

客來恐話到人間借得清言暫討閒風暖有時行鶴
徑雲深無路扣柴關新松峻嶺培三尺流水孤城抱
一灣讀罷五千文欲倦自斟春酒破愁顏

初構田廬辱知親枉賀

不惜經營海上勞數椽臨水繫漁舸摩天鶴老巢珠
樹行雨龍閒臥碧濤山落北窓江勢湧塔懸東閣日
華高何當賀厦賓筵頌丹穴長生五色毛

冬月邀譚太守

錦筵紅燭草堂開白馬朱轡照地來威鳳下儀黃霸
政神羊高拔漢廷材霜天月午懽初洽海水春銷歲
欲回獨愧主人情未劇貪聞經濟數停杯

九月望日西園宴客

蕭瑟城西秋色偏凭軒共醉沈寥天山開場圃清時
稼日照壺觴上客筵馴鵲繞林閒渡水垂楊拖地靜
含烟移尊幾處懽方洽庭院無風月正圓

花前攀楊文學輩

草堂尊酒殿殘春朝對粧臺花氣新總爲風來長學
舞不緣雨過暫含顰酡顏偏媚雲霄客雅思還親江
海人一攬鉛華應盡興何須更踏軟紅塵

蘇軾元旦有作

曉沐彈冠對鏡時滿頭添得髮如絲已知歲曆今朝
換尚計春光五日遲客到試嘗新上酒花開且看向
南枝心期逐節酬高咏彩筆先題元旦詩

西園與子厚幼名任甫懽飲

風鳴萬樹作秋聲坐對西湖一片明酒映花光香共

烈衣沾荷氣味偏清詼諧絕似東方朔禮法難拘阮
步兵總是山中舊知己相逢不用話平生

春日西園候程齋諸君子

春光駘蕩滿江城楊柳風狂過午輕幾種籬花猶辨
色數聲山鳥不知名逢人自愛清尊倒傍我何妨白
髮生却恠鴟夷湖上棹遲回烟水待功成

臘月望前一夜與君仁子厚對酒

寒宵客至促飛觴殘臘無多秉燭忙江郭更籌催漏
箭草堂明月帶清霜嫌將美服招人指笑取新詩換

舊詩堂集 卷之四
酒嘗回首西園春事動又陪花鳥競年光

和劉子厚春城晚眺韻

芳菲欲盡覺春還閉戶空令杖履閒遠覽可能窺物
外勝遊偏欲出人間花隨流水經雙壑鳥帶歸雲落
半山痛飲傷春衫袖濕酒痕不管淚痕斑

秋晚過西園閒眺

萬樹蕭森古寺西振衣臺榭獨攀躋東林砧杵秋風
急西嶺雲霞落日低徹蓋不驚山鳥下憑欄還許水
禽啼盈場粳稻多宜酒歲晚朋簪日日攜

往來看移秧

三里唐灣蕩小舟短蒲新水獨遨遊江聲曉聽山前
櫓海色晴看塔下樓市井何妨行處隘乾坤真覺此
生浮看雲倚杖銷長日不爲人間十口憂

季冬朔日大雪

江城蜡月散瑤華臘氣含春滿萬家旋舞黃昏入簾
幕厚鋪清曉映窓紗種成瀛海田田玉開徧寒林樹
樹花不獨孤吟堪對酒風流還煮建溪茶

西園書懷因赴儲幼度席

孤城落日對寒花惆悵西風思未涯白髮漸添塵世
事青雲猶隔野人家不堪砧杵催秋老漫有詩篇答
歲華最喜東鄰新酒熟一瓢今得醉侯芭

十月朔日登臺奉呈王近老

危樓朝倚碧天寬瞥眼流光過鳥看秋爽早收千里
淨冬晴初散萬家懽長風吹髮蒼籐健短日依人白
紵寒山水泠泠七絃在相逢不惜爲君彈

初夏西園戲邀奎老

招隱無人興未窮自攀叢桂小山中盈庭苔綠多因

雨滿院花飛不待風妨俗敢辭呼是馬諱名何意夢
非熊閒亭欲捲疎簾奕易敵還邀避世翁

冬月久雨懷西園

妬人天不遣山晴歲莫時時風雨鳴柳帶正垂峰骨
瘦梅花空夢月魂清寒添五尺門前水濕壓三旬海
上城卽使登臨將繼日先期已曠負平生

暑中辱南淮先生枉顧西園

避俗柴門向水開清風忽枉故人來看山不用安期
杖對竹聊傾袁紹盃歸路何妨微雨滑去程惟畏暝

鍾催衣冠老去稱耆舊桃李曾收三省材
和袁仲子春城晚眺韻

當年題柱笑吾曾此日林泉興獨乘拋卷自甘空谷
臥振衣時借好山登楚江細雨成邗水蜀地平岡接
海陵望裏川原堪一醉欲傾鸚鵡恐難勝

沈君仁以尊堂壽日邀飲

慶日頻飛壽母觴春風入戶綺羅香昔稱司馬三公
第今作孤鸞百歲堂庭花盡是仙人草甕酒多疑玉
女漿燕喜不辭深夜醉梨園引興發清狂

新竹苦風

淺土蟠根力不禁狂風挾雨鎮相尋猗猗影亂筠翻
塢撼撼聲高葉墜林響徹石床僧夢斷動連山閣客
愁深東園桃李花無語應笑孤吟亦苦心

南莊曉對期樂軒丈

面對蓬萊徑不斜到門初日樹全遮雲來小洞石林
氣香度輕裾稊稻花野色淒清秋可掬交遊疎濶老
堪嗟南山一醉佳期在倚杖河橋望小車

夜坐有懷因寄鄭東泉

明河清淺照江臯爽氣空庭薄紵袍雲淨新秋淮野
濶星疎深夜楚天高兩朝臺寺名猶在十載江湖夢
亦勞老向山人問真訣有無大藥伐吾毛

漫興

高齋東下鶴城隈窈窕林深晝不開霜落小松龍未
起日臨修竹鳳還來孤標塵外閒投老往事燈前重
惜才短榻在縣香在室春明猶欲臥蒿萊

臘月舟行晨起見雪

長河一夜放歸船瑞葉平明飛滿天野寺沈沈聞曙
鼓郊墟漠漠見朝烟曉迷山徑人踪滅寒逼蓬窓客
臥堅正喜西園梅幾樹破香含笑竹籬前

初九苦寒晚坐懷奎老

至後新寒晚薄膚添綿欲向酒家胡囊空笑拂床頭
杖灰冷恁噓竈下爐中聖百年心賞在爭雄一夜手
談孤滿庭霜月明如晝四顧應無隣可呼

唐龍渠習靜泰山

高山遙望一重重顏闔今來第幾峰窈窕林深無櫪
馬崢嶸地勝有蟠龍朝登絕壁青雲遶曉揭晴窓紫

舊集卷之四
氣封君去人寰纔咫尺翻疑天上杳難從
迎春先一日小雨期奎老對局

江城細雨洒春前漠漠烟雲黯黯天未許陽和回白
屋已看膏澤遍青田西山莫負池邊杖東道須開海
上筵老去何心問人世枯碁三百自年年

山房自述

滄海清時只漫過角巾相對小岩阿天憐花事輕陰
散鳥悅山光好語多白髮何孤閒歲月綠尊不負舊
烟蘿東風故有吟邊約日暮松聲起細哦

晚歸自郭外登樓寓目

紺宇纖埃淨不流暮烟墟里望中收晴嵐絕巘孤城
繞夕鳥平林萬樹投天送爽風蘇病骨月臨高閣動
歌喉憑虛回首金陵近遙見文昌映斗牛

壽張母八十詩

翠幌金翹十二樓青禽雕輦降環洲懽聲競逐簫聲
起喜氣遙連婺氣浮玉樹光生庭下彩紫芝香動郡
中謳班聯子壻長春祝更住人間八百秋

對幼安談里中著姓有感

空山寒色重飄零尊酒逢君醉不醒伏櫪非時悲駿
足冲霄有日美修翎人中自許寸心赤世上誰憐雙
眼青共惜洪支盡彫落西園賣到翠微亭

夢龍渠有感

依然尊酒笑談親寒夜青燈入夢頻岐路幽明三歲
隔世情涼燠幾番新巨卿不負生前好到漑何孤沒
後貧欲語深心重合淚田園今盡屬他人

登樓見積雪

積素城頭凍未銷憑高望入海天遙樓臺半帶吳山
色澗壑平添楚水潮扶策欲穿方朔履探詩何俟鄭
公橋紅塵壓盡千林爽不醉壺觴興也饒

冬日過劉平湖

籃輿郭外訪幽人近市深居不染塵當戶好山廻夕
照遶門流水對寒津枕書獨臥庭前雪投轄頻開甕
底春我有橘中孤興在無緣縮地結爲隣

酬周兩橋用韻

草堂雲臥拂衣人短褐山中卸六塵老向醉鄉尋樂
地閒從文海問通津清朝搖珮應無夢寒谷吹灰自

有春開閣敢當門下客願將詩句作比隣
同儲幼安諸友小坐因期賀幼度生辰
邀懽歲晚客還來文采翩翩下才對燭呼盧香篆
裊過橋沽酒草堂開時窮物態悲難合老去年華喜
復迴猶幸百錢囊底在錦筵堪獻紫霞杯

蜡月九日殘雪在山同奎老諸君過王磐石

積素叢遮海上城江天日落暮寒生含香冷伴梅花
笑流影清添月色明遠訪自攜沽酒費勝遊同結看
山盟淹留地主情何厚夜半猶聞落子聲

冬日登樓曉望

壁立危樓四望中晴雲縹緲碧天空鍾山王氣千年
合環海仙槎萬里通寒色城陰殘雪白暗香堂背早
梅紅凭虛半醉清狂發倚劍長謔老更雄

寒夜留幼度幼名任甫小坐

陰森寒色動茅堂客到盤飧醉一觴攢火滿爐屏半
掩圍碁三局酒初香歲荒供給山中少誼合提攜海
上長回首分宵歸路黯數聲清漏入微茫

冬霽曉過西園眺望

雪後新晴朝日曛寒光暖氣忽平分陽和傍曉霜全
霽春色臨風酒半醺楚甸歲前沾帝澤漢宮天上擁
卿雲最憐萬樹蕭疎候香塢梅花獨不羣

却雪有感漫筆

三白還驚亂雪飛瑞多翻使賞心違愁來獨倚年華
好老去那堪世事非何處天高開霽色幾時臘盡斂
寒威吟窓忽送梅風入知是春從歲底歸

雪中喜戴劉二丈見枉

握手衝寒二妙來華門忙向雪中開蕭騷不帶人間
氣麗藻堪言海上才酒盡呼茶凭几坐局終扶杖望
山回新晴更擬登臨去萬樹橋邊一覽臺

歲底連陰戲呈奎泉丈

寒城歲暮積陰連暝色沈沈白晝前豈妬高懷淹好
景似催短髮換新年枰開竹葉長春地雪照梅花不
夜天底事幽人負清賞擁衾江上抱愁眠

晨起見雪因呈王近翁

春前頻雪也應知落向人間乞好詩五夜明生江閣
早萬山寒壓曙烟遲青萍顧我渾成鐵白髮逢君總

是絲好隱墻東王應仲擁爐尊酒定相思

春前贈張將軍紹容

虎旅將軍策戰勲也因多藝識山人五雲書法牙前
肅七步題才閫外新幕府風清鳴噪少海門波靜和
歌頻還看獨立空邊塞一劍功成早畫麟

其二

淮海氛銷仗楸勲日高江閣臥閒人霜零草木朱旛
歇雪霽湖山綠酒新白馬平原垂佩緩玉簫明月倚
樓頻更看文采弓裘舊步武庭前有石麟

端陽登金山二首

片峰高插翠雲巔峻塔凌空鳥外懸漠漠帆幃通島
嶼溟溟烟雨暗江天鐘山王氣千年在淮海風流一
代傳况是登臨逢楚節招魂還欲吊湘川

其二

壁削芙蓉面面開乾坤此日一登臺烟波萬里客長
到樓閣中霄月自來流水無情天地老浮雲不住古
今哀聊將佳節酬清世共取峰霞照酒杯

春園奉在周明宇公祖時公已報轉河南學憲

才子風流舊水曹品題隨處馬蹄勞孤標拔俗人猶
古彩筆凌雲氣自高笑對梅花飛玉蝶行逢秋水跨
金鰲芳菲倍覺春林滿文采翩翩照錦袍

其二

小隊來看西郭山寵光添得百花顏水涵高柳池光
淨吏散空園人語閒三月湘潭人欲去千年風雅道
初還慙慙預惜離亭酒黃蓋朱旛征馬斑

其三

邀懽二月小湖來郭裏憑高望眼開落日川原狎禽

鳥春風花柳醉樓臺淹留暫作淮南客麗藻真稱鄴
下才傾蓋逢君那忍別想思從此望三台

其四

廉鎮旌旄擁地來草堂今日白雲開風前披拂柳垂
地樹杪徘徊月上臺七校指揮初耀武六經商確早
掄才遙看綉錯中原地已有文芒獨上台

譚見吾父母德政詩

秋風桂殿醉瓊筵雙鳥飛鳧到海邊駝嶺兒童迎竹
馬鳳城人吏候蒲鞭真心自許仁爲種古道還看直

似絃野史爲裁良牧傳衍歐堂上繼前賢

右淮海仁天

其二

漢家仙令愛相如今代何人虛左車冀北材多煩剪
拂河東賦好借吹噓不妨晝靜花迷鶴且喜堂空雀
化魚但取涓塵禱海嶽肯因八斗失劉徐

右禮重儒生

其三

信是文章被折磨有才無命奈如何履從東郭階前
破粟讓柴桑瓶裏多老馬未收燕市骨神蛟欲奮禹
門波解推賴有明庭在彈鋏寧須發浩歌

右優贍貧士

其四

從來艷說海陵紅災後徵輸萬室空政拙任教官長
怒刑輕忍見細民窮懸知陰德歸王賀更有清操並
趙公早晚司農蠲大賑天恩良牧一時逢

右寬徵民賦

其五

讞獄誰稱第一流使君庭下鬼神愁明懸淮海中天
日威讐吳陵六月秋獨抱爰書投栢府肯留幽怨泣
梧丘鸞鳳鵬鶚恩相濟會看弓旌出鳳樓

右斷獄明允

其六

鳳凰城畔闢蒿萊高閣文昌亦壯哉冠蓋日迎賢使
者笑談時對老都臺糝分紅粟官中出鮮解鮭魚江
上來雅意直將回氣運風流還羨嶺南材

右分助學工

其七

風塵傲吏耽經史長日開軒我輩過利器每思身負
笈飲醇却聽口懸河高齋雨歇琴書潤花徑春明桃
李多自是文翁能化俗吳陵閭巷盡絃歌

右敷教溫良

其八

泰堂三載羨冰清共道淮南有福星贖鍰盡蠲無枉

獄胥靡不罰自明刑靜看秋水搖官舍漸數林鳥入
訟庭屈指關西今有幾皎然日白與天青

右捐除贖鍰

其九

千里辭家虎竹分孤琴獨鶴笑離羣寥寥官舍如僧
舍澹澹吳雲隔楚雲心遠向平無俗累政同單父有
清芬知公世訓慙溫飽薄祿何曾問細君

右不攜眷屬

其十

孤清莫謂太迂疎供應寬民總革除有鶴避烟堪淪
茗無人漑鬻可懸魚閒時束帶了公事盡日焚香理

道書真是大賢成吏隱不煩騶從擁潘輿右禁革茶厨

其十一

萬方養濟自天朝欲訴民艱紫極高岐下顛連貧徹
骨桑間賑卹澤如膏旌倪望幸千鍾盡覆載同仁一
日遭滿眼餓夫難遍活寒風獨立首重搔右賑卹孤貧

其十二

春風掛席射陽西半塔朦朧烟霧迷海色浮空天遠
近河流拍岸樹高低六鰲已借任公釣雙壁應逢使
者題處處沮洳成沃壤千年明德在黔黎右北澹河流

其十三

春明小隊扣蓬扉郭裏山林與世違古道欲窺書萬
卷閒心偏愛竹雙圍岩花對客渾如笑庭鳥依人故
不飛更上層臺南北望孤城一水欲沾衣右西園感時

其十四

入鳳

臨淮橋下白雲扉避世仙翁此息機雪澗倒流龍臥
穩石門重扃客來稀驅車每共評青史載酒何嫌歷
翠微坐久不知身是吏疎林細數落花飛右西園論文

其十五

歸來天上老中丞經世籌邊記昔曾一水杳然開綠
野百花深處倚蒼藤神翁地近真堪隱元禮門高喜
獨登不是尋常揮玉塵迷津時獲渡金繩

右縉紳知遇

其十六

斗南劍氣亘天橫雙檄朝飛入鳳城漢室循良推卓
魯明時仙侶謫蓬瀛青雲不信無知己白壁還應有
定名豈爲旌書便懽極祇緣直道快平生

右各臺交薦

周明宇兵憲詩贈小園倚韻奉謝

展雲梯石共高盤傾蓋初攀海上驩龍躍此時驚化
劍鶴飛何日驗還丹神遊嵩洛英雄毅夢遶漁陽老
將壇伏櫪年來無遠想枕書日臥草堂安

其二

春借平湖寵借君啼鶯幾樹座中聞風流才子不辭
醉疎莽山人亦好文日煖林香花作主竹深溪靜鹿
爲羣投桃博得瓊瑤報浣手開緘見五雲

中秋玩月嘲奎老先歸

獨處嬋娟水上頭凭高不用庾公樓天空寒色千山
動野曠清輝萬里浮人老自憐今夜月客歸空負一

舊詩堂集 卷之四
年秋勝遊咫尺還拋棄安得山陰更買舟

中秋代柬邀奎老

不將搖落對悲哉佳節芳樽郭外開天濶海涯人自
臥月明江上客還來水花含笑迎飛蓋山鳥成歌待
舉杯莫遣巾車滯行色嫦娥早已望多才

田隣聞寺僧吹笙漫筆

短日空山有梵聲淒清坐使俗緣輕桓伊高韻風中
切子晉孤吟指下明假榻卽看成小隱卜隣何止學
躬耕月明花落無人處寶筏金繩話舊盟

懷慎索書扇隨以泛湖題之

十里波光泛碧湖半天西落小山孤短蒲出水青如
洗好鳥依人白可呼放棹舟航尋窈窕捲簾樓閣對
虛無倥偬三月韶華暮欲趁餘春酒滿沽

雨後召客

辟疆花竹倍精神雨後生風曼絕塵病樹自留將墜
葉涸池堪轉欲枯鱗乾坤萬里明雙眼江海孤峰寄
一身對月莫愁尊淥盡床頭幾甕未全貧

雨中陪孫公飲竹岡丈宅

舊業堂集 卷之四
照地銀光五馬來翩翩燕喜錦筵開山前甘雨隨車
至座上清風拂袖迴三徑久淹投珮客五湖初試濟
川才江天回首看霄霽列宿煌煌逼上台

夜雨晨起過西園

傷春無計挽春行半夜風雷促去程宿雨含烟迷曙
色落花隨水帶溪聲柳絲夾岸千條弱山翠當亭一
片明莫道飄零紅紫盡天香還見滿江城

南莊小構述懷

隔水誅茅古寺東旋移棲息爲明農一階天上簪纓
客百畝城南田舍翁插柳近門陶令似種瓜留圃邵
平同他年江海談余者多在菴居社飲中

西園睡起卽事

春晴十日鎖茅堂遊興舟中到處狂捲幔頓生欹枕
懶開函翻作檢書忙幽禽樹杪一雙小芳草門前幾
寸長何處梅花飛短笛晚風吹落小池塘

荒園餞別陸誠菴孝廉是夜爲得佳夢

惜別空山敞別筵疎枝殘黛暮江天雲開曉閣鳳應
起雨過寒潭龍自眠秉燭夜談傾綠酒買舟春訪辦

青錢分明夢報南宮捷多少籠燈彩仗前

扶病過西園却詠

西郭重遊日未斜祥雲片片落晴沙一池紅錦魚浮
水三頃黃金菜放花南斗遙臨高士榻東風只在舊
人家春光駘蕩真堪攬已辦壺觴醉海涯

冬夜閱逸民傳有感

到窓幾點漏聲忙散帙篝燈坐夜長疎柳拂開簷下
月寒鴉棲定樹頭霜江湖有願心空赤龍虎無成髮
總蒼咫尺上論千載事從來吾道屬滄浪

燈夜同近翁集王磐石宅

燒燈張樂列瓊筵憶昔風流已十年顧我巔毛全老
矣見君庭桂尚森然銜盃欲問山中月吹角能銷海
上烟取醉不須愁夜禁四門鎖鑰在牙前

爲奎老代挽徐師

橫經七井似關西披拂春風壁藻齊龍去曉潭雲忽
散鶴飛珠樹月空低三年模範留淮海千里銘旌指
會稽他日微官仙里近淒風宿草數行啼

題杜氏水雲精舍

舊業堂集 卷之四
萬柳陰森抱一灣
瀟然精舍隔塵寰
邗溝遙注淮南
水天日晴瞻江上山
燈影夜航漁宿浦
酒香秋舍客
開關藏修况得飛騰地
異日青雲令子攀

同潘恒山閒步過張南溪

握手高原擲杖行
角巾風動晚山晴
白雲湖上青天
色綠樹村中黃鳥聲
菰米軟炊鄰飯熟
棊枰閒拂手
談清十年投佩歸來客
此日真成漉酒生

四月二日召客作

江城節序已更新
留得人間六日春
架上好花多未
放壺中濁酒正堪親
無錢偏愛開懷客
有扇何愁撲
面塵從此虛亭是
長夏清風來往屬閒人

春分西園再作

去來春日正稱平
佳麗應知向後生
池草已成千里
夢柴桑又辦一年耕
無私歲月山中往
有約鶯花郭
外行底事勝遊天
亦忌釀陰不放四郊晴

後坡過西園留坐

江城十月小春來
與客探梅信未回
著述虞卿今欲
老詼諧方朔世稱才
嘲時句博千人笑
體物吟成百

鳥哀潦倒空山儔侶少逢君那得不銜杯

初春過近翁園亭時聞州二守攜酒至

春色將予汗漫遊鹿車鳩杖到林丘屏開絕壁青霄
接蓋偃長松紫霧浮堂上主人真國老寰中勝地卽
瀛洲清風忽報軒車過欲醉梅花月滿樓

夜雨書懷

雨聲一夜枕邊來嗚咽淒風漏鼓哀魚鱉幾年傷百
里雲霄此日望三台客緣興劇衝寒過花爲春深帶
怨開我欲憑高訴青帝仙槎猶自隔蓬萊

挽學博徐先生

三年化雨洽青衿四月門墻洒淚心西日照盤留首
藉東風鳴匣臥瑤琴道高共惜真埋玉祿薄猶能屢
却金千里一官歸去晚旅魂空渡越江深

冬夜獨坐因念劉子厚

冬晴朝暖暮寒生不待西風颯有聲沽酒探囊雙劍
在拋書擁褐一燈明霜鐘冷度山邊寺月壁孤懸海
上城遙想夢炊劉越石淒其此夜定含情

荒館驟風詠以自遣

山風飄忽起青蘋掠地翻憐淨軟塵白日赤霄渾欲
墮紫囊丹篆故堪親長松偃盡龍全伏短髮摧殘雪
半新多少梅花寒塢裡等閒吹破楚江春

荒園夜步長春塢詠景

策杖長春永夜涼小山寒色半青蒼檀欒叢竹高撐
月偃蹇虬松瘦帶霜萬鳥林棲孤鶴立百花塵委早
梅香清平海上歸來客獨抱遺經臥草堂

偶同儲幼度幼君集丁任甫宅

山閣人閒一事無玉壺提挈過潛夫雲涵雨色昏連

海河遶城陰曲抱湖翠釜峰高織手作洞庭春滿畫
橋沾形骸盡付忘年外幾局憑陵任叫呼

沈園歸早卽事

九十春光今半過百年能毅幾消磨燈前遠客忽然
到花下遊人可奈何笑把千金拋一刻羞將巴曲換
吳歌纏綿總是東風力松栢無心附葛蘿

中春望日同奎老諸君過沈園

江上分春自可憐况多照眼好花然浮塵著我渾無
地高閣留人別有天鳥度綠楊雙翼下山開青壁一

峰懸百年狂客逢今日沽酒寧論費萬錢

山房有感

新旭颺暉破曉林凭闌忽動歲寒心黃金臺畔乾坤
老白雪樓中日月深地僻絕無人問訊山高時有客
登臨衝泥何處堪投足坐對梅花只苦吟

雪融

黯黯陰雲積雪消東風送暖到山椒玉容破臘排梅
萼青眼窺春綴柳條過澗無泉看脉脉巡簷不雨聽
蕭蕭冰霜忽見陽和轉黃閣誰將玉燭調

中秋對月嘲戴維新諸公早歸

一片孤光碧水頭臨臯絕勝夜登樓高浮空翠江相
映晴捲雲綃海自收客散獨留城外月吾衰不負病
中秋人寰何事催歸急未醉飄然蓮葉舟

南莊偶賦

風送空齋午簟涼翛然一夢到羲皇送書門外人驚
犬慕道山中石化羊老味詩篇還不厭病遺身世復
何忙五湖欲寄元龍傲白眼從他笑我狂

沈園同戴維新小坐嘲蘇後坡不別而歸

載酒名園北海濱清時堪伴兩閒人雲棲皎皎身俱
鶴雪點斑斑髮總銀扶杖看山逢雨好拂枰移席向
風新誰知南斗清狂客老怯先逃軟脚春

儲幼度幼名丁任甫在顧南莊

別墅翩翩降列仙高懷人帶杖頭錢青沽市酒千巡
徧白煮江魚一味鮮浮世總消荒野外驚塵不落好
山前還期共醉中秋日月色波光載滿船

十四夜無月

百年能得幾元宵月色燈光兩寂寥火樹無花人影
暗香塵不踏馬蹄驕漁陽麥秀山輝映合浦珠還海
富饒早晚鳳城風日轉夜看遊女度三橋

初春過舊業堂

雲臥堂開白日高春風依舊長蓬蒿山飛翠靄遙侵
筆柳拂黃金澹上袍身退誰知湖海傲詩成自擬古
今豪清時長晝閒披卷垂領何妨有二毛

對客小酌忽大雪滿庭

東皇破格散瑤華萬壑千山樹樹花對酒喜生豪客
坐占年愁入野人家路迷易失橋邊句風緊難烹鼎

內茶早晚樓頭送新霽春光隨日到窓紗

東戴維新文

倚闌無客漫登樓遙見城南紫氣浮笑語隔君纔一日風流違我忽三秋白雲洞裏家堪住青壁峰頭杖可遊世路升沈元不定莫教心事愧沙鷗

冬日西園酌戴維新丁任甫夜歸

身閒自覺海天寬老興空園儘耐寒濁酒正須佳客醉好山不借俗人看風鳴古木鴉千點日落疎林竹幾竿攜手夜歸松際月緩行真勝御雕鞍

戲呈戴奎老

不厭清狂興日增草堂時許客憑陵憂時意氣同元亮覓句風流似季鷹三爵不醒猶說量一枰屢北更爭能忘形老去真吾伴握手寒山百歲登

登山望雪期友人

倚闌高閣望瑤華冷壓吳城十萬家繚繞香烟浮曙色飄飄蒼玉落寒花樓臺橫自孤山出杖履深從遠樹遮爲問高陽興何似東鄰正有酒堪賒

假山成期儲幼安

片石磷磷東海濱青峰初對白頭人百年欲傍孤山
老十月能生小洞春黛色含烟浮杖薄鳥聲調管入
筵新最憐客有玄暉興載酒登臨不厭頻

苦寒懷戴維新

寒色侵凌老不禁高齋白日到簷深擁爐暫歇登山
脚倒屣空懷愛客心漫倚清尊消短景回看白髮起
孤吟綈袍忽憶城南麓雲護霜封未可尋

題園山

八九峰高面面新海陵形勝屬閒人湖邊夕照留餘
景屏裏寒花待好春一日不教無客到四時惟愛有
雲屯縑塵欲盡孤亭遠客與池塘白鳥親

夜酌戴維新丁任甫賦此再期

城闕沈沈漏鼓高恣談尊酒見雄豪也知叔夜妨人
世未許元龍傲我曹十載風塵空劍缺一生江海只
綈袍不嫌山閣饒風色來聽松聲月下號

歲晚對鄭澄之戴維新二丈

閒度韶華又一年笑將眠食戴堯天衣冠鄉里成三
老歲月壺觴費幾錢碁罷酒闌人未醉星飛霜落火

猶然貂裘典破黃金盡誰識風流是謫仙

登山亭南望

曲徑盤迴到草亭遠山江上坐中青江從吳楚連滄
海山自雲霄落翠屏六代舊宮收王氣十年孤劍拂
殘星鳳凰臺上題詩後冷落青蓮夢不醒

懷西園柬儲幼度

江郭新晴好探春街頭殘雪故留人空瞻柳色千門
黯遙對梅花一樹新翠竹青山迎杖早白雲芳草夢
詩頻喧喧最怕車聲過泉石相宜是角巾

題郡齋清玩卷

絕島迢迢雲與居蓬萊日日望安期清風只在瑤臺
曲紫氣紛連鹵水湄杖臥蒼龍空自住庭閒白鹿竟
何之人間會有青鸞至翠蓋翩翩慰所思

病後有感二首

一夢初醒倍自傷幾回搔首問蒼蒼長弘欲化千年
碧鄒衍將飛六月霜江上貫星空自黯天邊解釋會
能長五原獄辨來甘雨柱史名垂萬載芳

其二

殺氣橫生慘淡風憑高徙倚思何窮鳳凰不見朝鳴
閣鷹隼正當秋擊空三木苦加黃霸後一床老徙管
寧東何時洒血平蕪淨大笑持螯明月中

謝沈君仁文學邀賞架花

最憐公子能留客花下關尊對畫屏繞室縈縈芳樹
滿連山滴滴小峰清錦筵銀燭催更漏玉署瑤編憶
典刑莫以蹉跎虛壯齒弓表不改在遺經

南莊邀王師董黃子薦二姻丈卽事

大火扁舟到草廬清風南浦縱觀魚綠垂高柳陰成
蓋翠拂良苗香襲裾舉網亂翻三尺滿引盃長醉百
年餘選幽更愛月塘好歲晚同盟此卜居

月夜留杜君實儲幼名小飲未醉而歸

雪月當樓映草堂絲絲獨照髮毛蒼清光墮地瑩如
水寒氣侵人冽似霜身世半成終古夢憂勞全減十
年狂市沽不醉千鍾客好待壚頭騰酒香

雪中同儲幼安幼名丁任甫登山

停舟江上雪霏霏帶雪看山願不違積素擁門高躡
屐展飛花撲酒亂沾衣從龍一片孤峰迥瀾漫千重遠

樹微對景正堪人共醉山陰何事夜空歸

山房詠梅因憶儲幼安老弟

羣芳雪後總凋殘兩樹梅花獨耐寒不避繁霜飛院
宇長留明月照欄杆幽姿故許詩人詠瘦骨翻嫌肉
相看何日東風開爛熳一枝先折寄潘安

春日同儲幼度幼安張懷慎泛舟

新綠半篙南浦濱飄颻一棹過春林青山有約盟難
毀白雪無情鬢易侵沙勢抱城橫疊帶水光浮日碎
搖金高談秉燭留髡久酒罷更闌興轉深

梅花

點綴寒英泗水濱六花飛處倍精神橫斜影臥羅浮
月南北枝分大庾春千里夢回窓外發一枝人寄隴
頭新據床三弄桓伊笛高調惟堪伴隱淪

杏花

崢嶸三月上林花開向臨淮處士家紅粉勻成粧鏡
酒錦衣裁就舞樓霞笑喧隣女窺春色香襲遊人染
露華猶記曲江遊宴日一枝歸插髻邊斜

桃花

任教蜂蝶樹頭喧伴李成蹊故不言灼灼春花明海
日纍纍秋實落江村重遊尚憶玄都觀三摘曾過金
馬門一自河陽凌亂後每思潘岳爲消魂

梨花

素容亦自引蜂狂張谷花開散異香月上晴窓來好
夢雲臨曉鏡試新粧千林布暖春飛雪萬樹生寒夜
隕霜飄落不教空爛熳高秋垂實薦瓊漿

桂花

黃金爲粟玉爲芫爲耐冰霜手自栽香處九天秋色

重花時滿院月明來王孫只合山中隱法侶疑從嶺
上回自昔廣寒攜手後年年凝露數株開

玉蘭

春城紅紫正爭妍縞素爲裳獨可憐色借崑山仍琬
琰香分楚畹未芊綿初含曉露簪如筆若傍秋江白
似蓮窈窕月明風靜夜倚欄還看鬪嬋娟

牡丹

錦囊綠幄匝芳塵百寶欄杆處處新三月東皇仍作
主萬花北面總稱臣沾殘天上君王寵占斷人間富

貴春此日尊前聞笑語風流應識白頭人

薔薇

淺深幾架刺紅花春色依然石氏家香細欲浮鸚鵡
滿枝柔不插鷓鴣斜竹籬風動千重翠錦障雲生一
片霞閒向乾坤探至妙凭欄回首思無涯

寒日與儲幼安山前偶談

奕殘杖策眺寒山白石蒼松照客顏兩樹梅花春未
醒百年塵世役初閒淮南歲月從吾往鄴下文章見
子還尊酒相逢惟痛飲不須長話到人間

寒宵對局

几上提兵歲欲闌龍膏長夜照欄杆弓刀不動威三
楚鼓角無聲過六盤子落雷霆江郭鬪局殘風雨草
堂寒功成聊用酬清興日戀東山學謝安

寒夜儲幼安劉子厚對雪

對雪談詩興亦豪百年南斗見吾曹乾坤一笑開新
酒風雨相看戀舊袍雲薄暗籠江月白庭空倒映海
天高獨憐皎皎明雙眼不畏寒光欺二毛

和儲幼度寒夜獨坐二首

舊業堂集 卷之四
萬古閒愁烟不消疎燈自照思無聊草堂對雪披裘
薄山徑衝泥沽酒遙宿草驚心惟是蕙寒花媚眼獨
憐椒冰霜歷盡陽和轉依舊氛氲春氣饒

其二

子夜長檠燼欲消平吟寡和亦無聊寒江雪色孤城
近高閣鐘聲十里遙彈鋏無魚歌海曲掛錢有杖醉
山椒清時莫抱途窮恨花鳥林塘歲月饒

西園雪中晚別諸君子

飲罷躊躇下雪峰迴看石磴一重重傍林幾點江村
火隔水數聲山寺鐘顧影只堪青竹伴逃名何用白
雲封再遊莫畏寒侵骨春酒銀缸綠正濃

和儲幼度雪後登山韻

極目南淮雪後山迷茫殊不似人間浮先萬里長江
合元氣中天此日還鳥篆自平金谷路馬蹄應凍玉
門關不愁潦倒風流後手把蒼崖處處攀

自題海樓書屋

萬卷牙籤插棟齊草堂開向小湖西且拚歲月閒中
了獨許川原醉裡題一片晴雲當檻落數聲好鳥隔

花啼小山不是桃源處市遠林深路亦迷

元旦

高閣晨鐘報早春剪幡遺勝一城新九天佳氣浮滄海萬國懽聲頌紫宸添歲又驚霜髮改逢時自覺酒杯新陽回律變澄江綠十尺長竿理釣綸

元旦後一日西園對客

斗酒初春續舊懽新陽不散草堂寒愁來世上風塵惡老去山中歲月寬几列奇兵邀客賞庭留殘雪帶梅看生憎車馬排門俗相對尊前總鶻冠

新正三日西園對客

幾株松柏舊巖阿改歲依然有客過濁酒已成三日醉好風初散一庭和春回鳥語聽猶澁寒勒梅花開未多不把枯棋閒自遣浮生無奈白頭何

新正戲贈蘇後坡

坐臥清時老一丘美君終歲五湖遊閒中歲月金難買醉後詩篇人易求春入草堂花夢醒雪留山閣夜光浮人生莫取離鄉賤傲世元龍不下樓

新正十日西園遊覽

東風山閣往來頻十萬黃金買一旬冰片未消千澗
玉柳條先破一園春濁醪自許林中醉短褐何妨世
上塵好語百花開次第從容輪日入詩新

春日邀錢商卿諸君小酌

高陽狂客日攜壺共上春山興不孤池面錦鱗依碧
藻湖邊白鳥傍青蒲林深忽見燈明滅雲薄時看星
有無但飲莫論身外事古來賢聖幾凋枯

登狼山四首

乾坤雙眼望中開千里看山一棹來虎豹關當江路
截鼉鼉浪逐海門來客從方外遊初到僧在人間夢
幾回此日登高思作賦臨風誰擅大夫才

其二

平原盡處數峰懸擲杖憑凌最上巔春色到山青滿
野江流入海碧連天角巾雅稱孤山月桴鼓閒銷萬
里烟一醉凭欄愜心賞不須勒石在燕然

其三

層崖千丈片雲留海色江聲共一樓初旭籠烟山靄
合長風吹雪浪花浮摩天有路看黃鵠泛渚無心狎

白鷗琴酒近隨多地主慙慙分日作遨遊

寤寐名山五十年齋心作禮梵宮前橫江水濶疑無
地護洞雲深別有天澄海將軍醉花鳥中流漁父釣
風烟登臨已盡平生興莫道空回雪後船

過白蒲

一葉春風下白蒲東還餘興未全孤雲來山色時開
合日上波光乍有無彩筆不停紈扇草蘭橈長聽榜
人呼殘棋奕罷斜陽外野蕨江魚對玉壺

其二

臨淮春色未凋零逋客還山不用銘鹵海西來隋柳
綠大江南下蔣山青故園歸興疾於馬塵世行踪泛
若萍依舊枯棋三百在疎簾閒對翠微亭

題小西湖

半頃波光落鏡湖春風歲歲長菰蒲雲雷不動龍常
臥簫鼓無聲鳥自呼柳色遙添山閣碧月明深映草
亭孤乾坤閒地誰爭得留與詩人醉一壺

雨後西園與劉子厚閒步

澍雨隨風幾陣斜
晚涼先到野人家
雲山半挂青天
色臺榭全開錦
樹花身際昇平
思帝力老從歌
咏閱年華扶攜
踏向青苔徧新
溜緣堦走細沙

春日登狼山偶有所感

探奇春早白狼遊
烟霧蒼茫望十
洲萬里河源江
海合片峰天柱
古今浮振衣自
許高人上搖筆
還將好景收不
用崆峒倚長劍
數奇無意欲封
侯

答徐星樓詩翰

慇懃海上故人裁
初日芙蓉照眼
來白雪紛從紈
扇

落錦雲爛向綺窓
開論交尚憶鍾
山舊覓句真慚
下里才高誼懷
君筐篚外月明
良夜獨徘徊

新正四日對雨有懷迎春尚在七日後

栢酒新年四日開
江城全未見春
回寒深故欲摧
華髮雨細猶能
長綠苔天上笙
歌臨太液海邊
宮闕望蓬萊青
皇不負林塘約
早送春風谷口
來

晚春過南莊

四載風烟入市塵
鹿車今始到平
泉門前日映沿
堤柳江上潮生
負郭田身退自
宜閒散地春殘
猶遇艷

陽天小舟蕩槳能迎客細網撈魚不費錢

小園往來觀者日衆漫賦識感

選勝開山塊石磻幽棲聊自籍盤桓江頭春色年年
到海上遊人日日看豈有穠華成錦綉獨留芳節長
琅玕滿城繚亂催科急何得餘閒問考槃

辱錢商卿儲幼安遠枉新莊賦此謝

步履來過十里遙墟烟漠漠水迢迢雲深窈窕山頭
路泥滑沾濡市口橋巢許逋逃還種秫求羊尋訪不
乘輶疎林落日空分手短句孤吟慰寂寥

初秋登臺東幼安老弟

虛閣無風亦自涼高原山色帶溪光酒塵清露明花
徑覆院輕雲暗柳塘禾穗半黃三伏雨髮絲先白九
秋霜從容讀罷安仁賦對酒期君話草堂

秋曉聽雞東幼安老弟

四十年前句曲秋曉雞曾送客中愁一聲忽爾聞孤
寢百感依然憶舊遊日月如流空老大江河不改漫
沈浮新涼雨後西園好還擬銷憂醉石樓

同戴維新張懷宇過南莊舟中手談

舊業堂集 卷之四
百口長懷生事艱郊墟數爲冒春寒柳條滿著黃金
縷菰飯空攜白玉盤一水分流扶舸進兩山如畫隔
江看不緣兔苑爲農去何得枯棋半日彈

秋燕二首

庭梧一葉報秋黃江燕歸心在畫梁飛嬾已如愁聚
散語頻還似問行藏長風送客朱簾爽短日辭人白
紵涼屈指來期是春社杏花開落井泥香

其二

搖落西風暑欲收雙棲梁燕動新愁穿殘簾幙千家
雨剪破池塘七月秋人世往來雲忽散年華代謝水
空流烟花回首春明日還傍元龍舊臥樓

賦小園五月榴花

翠萼丹葩五月花枝枝爛熳吐山家栽從西海仙媛
宅移上黃河使者槎醉眼有人仍物色賞心無客自
年華朱門此日矜粧束妬殺紅裙在絳紗

賦小池荷花開

新荷出水數花開拂面香從太液迴不月珠圓知露
綴無風萍躍覺魚來波搖菡萏懸冰鏡壁削芙蓉倚

玉臺不獨習池成一醉碧筍書盡見題才

對牡丹

乾坤原自厚山靈依舊名花開滿庭想見主人頭更
白應憐客子眼終青麒麟半睡香愈酷鸚鵡雙飛瀉
未停對此老懷難料理幾番沈醉幾番醒

兩日不過西園忽見玉蘭開謝賦此一笑

載酒看花對客遲玉蘭臺榭已離披春風嘘拂猶憐
汝明月徘徊欲待誰豈厭繁華供俗眼不因衰謝廢
吾詩綢繆好訂來年約早辨凭欄金屈卮

詠牡丹和倪湛川韻二首

憐君花裏獨稱王幾度攜壺入醉鄉風動翠裾呈妙
舞日臨鸞鏡試新粧臙脂半染欺宮錦粉素輕勻薄
曉霜縱是無情周柱史也應撓亂鐵心腸

其二

春山新旭上芳姿紫翠遙連碧草滋青藹帳前歌越
女沈香亭畔舞燕姬酣容不待金壘倒妖態還從玉
露披疑是陽臺逢宋玉孤唵千首結心知

見青梅紅梅早開

皎皎芳肌白易緇別塗紅粉混妍媸新枝獨冒冰霜
早疎性爭嫌桃李遲漫指春華舒老眼細看風骨識
幽姿孤清仍是松筠伴開遍園林蝶未知

和王師董見贈元韻

愚谷依然山寺西武陵何事世多迷潭碧秋水涵天
盡翠竹春雲拂地低道直有人呼北海境偏無客過
東籬獨憐王翰幽居近時送清風到石溪

舊業堂集卷之四

終

